

48384

فايساويات

لا حرية بدون أفكار

{ دماغ السحاب }

بقلم /

مينا فايسي

دار روعة للطبع والنشر والتوزيع

الطبعة الأولى ٢٠١٣

"فايساويات"

بقلم

د/مينا فايسي

تصميم الغلاف /

محمود عمران

الطبعة الأولى ٢٠١٣

دار روعة للطبع والنشر والتوزيع

المدير العام / هبة الشرفاوي

موبايل : ٠١١٤٠ ١٧٨١٤٤

darrawaa@yahoo.com

رقم الايداع : ٢٠١٣/٣٩٨٣

الترقيم الدولي :

978-977-64-11-23-4

فایس او یا ایا

أنا

معرفش ليه المطلوب انى اكتب مقدمة عن نفسى ، اكمنك متعرفيش يعنى .. !!؟
غالبا اللي بينشروا افكارهم ناس مشهورة قوى واللى بياخدوا قرار زى قرارى دة
يقوا ناس مهمة جدا .. بس هو مين اللي بيدى قيمة للناس غير الناس نفسهم
برضة !!؟؟ .. وانا قررت ادى قيمة لنفسى ولافكارى لانها بتحكى عنى وانا مهم
جدا عند نفسى وبحكى عن نفسى كممثل لناس كثير قوى مش مشهورة فالمشاهير
فئة نادرة عشان كدة " مشاهير " ، لكن الاغلبية زى حالاتى وبالتالى افكارى
ومذكراتى هى تعبير عن الاغلبية

انا هختصر لان مش المهم انى اكون يادوبك ٢٥ سنة بس ، انى يادوبك لسه
متخرج من كلية الطب بمقاليش ستين بعد معاناة سبع سنين دراسية ، ومش
المهم انى من المدينة المستقلة باسلوبها المتفرد " المحلة الكبرى " .. كل دة مش مهم
فى الوصول للمراد من الكتاب ، لكن منكرش ان كل دة ساعد فى تسريب
الكلاكيك اللى فى دماغى وحيى للكتابة واعتبرها الصديق المثالى على مدار السنين
الاخيرة

انا حاولت كثير اوى اعرف نفسى واقدر اكتب عن نفسى بس اكتشفت ان
الموضوع مش سهل ... اكتشفت انى محتاج لعيون تانية تدخل جوايا وتعرفنى معايا
... ويمكن الكتاب يوضح حاجات كثير عن عقلى وقلبى لكن فى حاجات محتاج
اكتبها بوضوح عشان تعرفنى اكثر ... حاجات جوايا اغلبية اللى فى حياتى
ميعرفوهاش عنى

انا لما بكتب .. بكتب وانا مش عارف بكتب اية وازاى ولين ... بكتب عشان
انا بحب اكتب ... مافيش حب مسبب .. لان لو فى سبب للحب هينتهى الحب
فى حالة زوال السبب .. وعشان كدة حالة الحب مع الكتابة هى حالة غير مسببة
... لكن اكيد اللى يحب ييقى على الاقل عارف هو بيعحب مين ... لكن انا
فعلا لما بكتب مش بلحق اعرف انا بكتب عن اية .. بجرى على القلم واكتب
بمنتهى الحرية والعفوية .. وبتولد الفكرة مع الكتابة مع الوقت ... اوقات مش
بعرف مين جاب مين بس المهم ان بقى فى كتابتى فكرة مع الوقت .. فى حد قالى
ان دى مصيبة .. انا مقتنع برأيه جدا بس مشكلتى انى مصيبة زى كتابتى وعشان
كدة انا مستمتع بالمصيبة اللى بعملها .. اللى عاوز اقولهولك الحاجة اللى بتحبها
اعملها .. بحرية وبعفوية ... حتى لو شافها غيرك مصيبة .. انتا بنى ادم مش اله
ومن حقت تعمل المصيبة ... استمتع بمصاييك

انا بكلم نفسى ... كالعادة طبعا هلاقى الاتهامات المعتادة بانى مجنون ... عادى
... بس اى اتنين يحبوا بعض لازم يكلموا بعض .. انتا ازاي مش بتحب نفسك
لدرجة انك بتطنشها الطناش دة كله ومبتكلمهاش !!؟ ... ازاي يجيلك قلب
تسيب نفسك كدة يوم ويومين وثلاثة من غير ما تكلمها وتفضفض معاها فى
اللى حصلك فى ايامك اللى فأت ؟؟ ... اللى حكم على واحد بيكلم نفسه انه
مجنون هو اللى مجنون ... لو بتحب نفسك كلمها .. هى محتاجة لدة صدقنى ..
بس انتا مش واخلد بالك .. متعملش زى الاب اللى عشان يعيش ولاده احسن
عيشة سافر برة عشرين سنة ولما رجع لقى ولاده مبيجهوش برغم اللى عمله
عشانهم ... لانهم ببساطة ميعرفهوش ... لانهم ببساطة مكنوش محتاجين

الفلوس اد ما كانوا محتاجين للطبيرة والحنية في عيونه وهما بيكبروا والشخطة بتاعته
اللى بتصحى وبتفوق من غلطات التجارب كانوا محتاجين لابوهم مش لفلوس
ابوهم .. اتنا بتعمل كدة مع نفسك وبتتجج بمسئولياتك ومشاعلك بانك عاوز
تعيش نفسك احلى واحسن عيشة وبتصرف على نفسك بأكل وشرب وبلا ب
توب ونت وموبايل وتذاكر ماتش كورة وحساب قعدة كافيه وكل حاجة بتاخذ
حتى وقت فراغك من المسئوليات ومش بتلاقى وقت لنفسك ... تعرف مالها ..
محتاجه لاية فعلا .. اية اللى فرحها النهاردة ... اية اللى زعلها النهاردة .. على
الاقل عشان خاطر بكره

انا ساعات لما بحلم معرفش نهاية ... في كثير اوى يقولوا ان دة غلط .. وفي يقولوا
ان دة قمة الصح ... مش مهم .. انا شايف ان الاحلام مش زى الافلام ...
اول خطوة في الاحلام " اللى من النوع دة " انك متفكرش في شكل النهاية ..
امشى في حلمك .. اكيد هتوصل في الاخر لمكان معين لو مشيت كفاية ...
جايز في الطريق يتغير حاجات بس صدقني هتوصل ... جايز حلمك نفسه
يتشكل باشكال والوان تانية ... بس ازاي هتعرف لو انتا متحركتش اساسا بحجة
انك مش عارف النهاية ... انا بحلم من غير ما اعرف النهاية ... بس عارف
السبب .. حرك جمود دايرة حياتك وامن انك تقدر .. اخرج من دايرتك بمنتهى
الثقة في عدم وجود نهاية محددة واحلم .. خلى بالك من انها مش قاعدة عامة
لفكرة الاحلام انك متعرفش نهاية ليها لكن لنوعية منها

انا لما بسرح مش شرط عشان بفكر في حد وجو الافلام العربى اللى بياخذ تفكير
البشر كلهم في اى حد سرحان ... انا بسمع موسيقى ... مش انا اللى يحنون

على فكرة انا اصلا معرفش ازاي انسان طيعى ميكونش عنده موسيقى جواه
!؟ .. ومتسألنيش عن نوع الموسيقى لانها بتتوقف على المكان وعلى المشهد اللي
قدامى ... دى مش حالة جنون لكن حالة حب للموسيقى اللي جوايا ..
الموسيقى اللي بتدى لقلبي احساس دافى بانه مش لوحده ... اللي بتخلى روحي
وانا على الارض قريية جدا من ابعد سحابة فى السما .. الموسيقى الداخلية اللي
مجرهاش قبل كدة يدى فرصة لقلبه ولروحه ولعقله انهم يغنوا ... انا فاكر زمان وانا
صغير كان فى كرسى كنبه كان متعلق عليه يافطة " ممنوع الاقتراب " لاني لو
طلعت عليه هبقى قصاد الشباك بالظبط وهقع فى الشارع .. كانوا دائما يأمروني
ماتقفش عليه عشان متوقعش من الشباك ... اول مرة عملتها من وراهم ووقفت
.. طرت ... طرت وانا لسه فى مكانى على الكرسى ... كانوا خايفين عليا اقع
فى الشارع والحقيقة انا ساعتها وقعت فى السما ... كانت اول حالة غنا لقلبي
ولروحي ولعقلي عشان كدة لسه فاكرها لحد دلوقت ... جرب تدى فرصة
للموسيقى اللي جواك انما تطلع

انا لما بتجرح بيقى مبسوط ... لان كل الجروح ليها دوا وانا جرحى له دوا اسمه
الايمان ... اصل انا عندى ايمان فى قلبي بان مهما كان حجم الوجع والالة جوايا
وان فى لو يوم من الايام شبايك حياتى فتحت شيشها وملقتش نهار بان احلى
الايام لسه معشتهاش .. وان احسن الفرص لسه مصادفتهاش ... وان اجمل
الزهور لسه مقطفتهاش .. ولو اتخلى عنى حد فى عز ما انا محتاجه يتولد فى قلبي
ايمان اكبر بان اروع الاصحاب لسه ما قابلتهمش ... وان اصدق الوعود لسه
متقاتلتش ... ومش بس اكتفى بالايمان لكن لازم اعافر عشان اوصل ولو نور

بكره ساكن فى ابعـد بلاد ... جـايز يـكون الـدمع مفيد ودليل على انسانياتنا لكن
الاستمرار فيه ضعف واحنا مش مخلوقين عشان نـسكن فى مدن الـاحزان .. عشان
كدة لما بنـجرح بـبقى مـبسوط عشان انا عارف ان ربنا شايف وعارف وهيجيب
حقى من النهاردة فى يوم بكره .. وان الدنيا مهما قسيت ليها ربنا دايما فى صف
الطيبين انا مؤمن بان اـكثر حد هـيـستمر معـايا فى حـياتى للـنهاية هو " انا "
عشان كدة مش مستعد اخسره قصاد اى جرح

جايز الحاجات دى تكون مشتركة ما بينى وبينك وجايز تكون الحاجات دى ولا
تخلينا متشابهين اصلا ... بس على الاقل تبقى فاهم انك مهما تفكر انك
نـجـحت و قـربت لـحد وفهمته بنسبة كبيرة اوى ... يـبقى انتا لـسه معرفتوش بما فيهم
نفسك ، وان الوصول لاعماقنا رحلة لا تعرف نهاية

عصفور بلكونتى

وأنا صغير كان عندى عصفور ماشوفتش عصفور زيه شجاع بالشكل ده ..
عصفور يعمل عش فى بيت مسكون كانت مغامرة ... لكن العصفور ده عملها
.. وفى بلكونتنا .. ومكش بيخاف منا ..

يعنى اية حياة ؟!

بساطة ده اللي احنا فيها دلوقت واحنا بنتكلم عنها

تاريخيا وحسابيا دى حياتك زائد حياة اللي قبلك زائد حياة اللي بعدك
فسيلوجيا احنا صنف من اصناف الكائنات الحية الحياة هى اللي بنعيشها بصحة
وعافية وبتتنفس ونعيش زى ما نعيش فيها لحد يوم ما يجى النصيب ونقفل الستارة
عشان صلاحية الصحة والعافية انتهت

رواياتك دى القصة اللي مكتوبة من قبل ما تبقى مشروع خلفه بين والدك
ووالدتك اللي كانوا زيك برضة مشاريع مكتوبة فى اذارك رينا ومن زمان قوى بس
ده مايمنعش ان رينا مديك الحرية فى تأليف الرواية
بس خلينا فى البساطة .. حقيقة الحياة هى انها اللي احنا فيها دلوقت واحنا
بنتكلم عنها

فى نوعين من الحقيقة فى حياتنا .. الحقيقة اللي احنا عاوزينها والحقيقة اللي احنا

عاشنها .. ابن المحظوظة هو الذى عنده الاثنين واحد .. فى النهاية تفضل حياتك
هى محصلة لاختياراتك و لو حياتك مش عجبك يبقى انتا اكيد مخترتش صح او
جايز تعاملك مع اختيارك الصح كان غلط او جايز اصلا ما بتختارش ومقضيها
صدف او سايب حد يختارك

إسال نفسك السؤال دة وجايز تبقى منهم .. هى إية الحياة بالنسبة لك ؟

فى ناس عندهم الحياة اختاروا تكون هى الحب .. الحب هو معنى الانسانية ..
انسان مبيحبش يبقى ميت عايش بنفس مش أكثر .. بس لو اختصرت كل الحياة
فى الحب هتبقى مشكلة لو اتجرحت .. وجروح الحب مش بسهولة بتتداوى
وبالتالى كدة هتبقى حياتك مع وقف التنفيذ لحد ما تتداوى .. دة لو حصل
.. نصيب ولقيت دواك

وفى انواع تانية من الحب غير الذى بالى بالك تبقى لناس هى معنى الحياة .. زى
الصحاب وتبقى الصداقة هى الحياة بس برضة جروح الصداقة غشيمة ومحدث فينا
مصادفش جرح صاحب من اول واحد لعب معاك فى حضانة وخمك فى
الاستغماية والموضوع كبير لانك مبيقتش بتصدق لحد ما فضح شرك وخان عهده
معاك وانتا شاب او عجوز ومبيقتش عارف تصاحب حد بثقة .. بس معنى كدة
ان الصداقة لو انتهت تنتهى الحياة !!؟ .. اكيد لا .. وبعدين لو الحياة هى
صداقة بس امال ليه بنفكر فى الجواز مكنا نقضيها صحوية وزمالة مع الجنس

الآخر وكفاية على كدة .. لا مش منطقي و يبقى حتى الانواع الثانية من الحب
غير اللي بالي بالك ممكن تلاقي فيها مشكلة ولو ملقتش يبقى انتا من صنف ابن
المحظوظة السابق ذكره بس دة ميطلعكش قاعدة بان الحياة هي الحب او ان الحياة
هي الصداقة

وفي ناس عندهم الحياة هي الفلوس .. الفلوس هي كل حاجة في حياتهم ..
الماديات اسمى الوجود عندهم .. حتى تفكيرهم في اللي حوالهم تابع من الفلوس
.. وتتحول المشاعر اسمى حاجة عندهم للملكية المادية .. يعني الاب يفكر في
ولاده انه يجمع لهم فلوس ويشغل هنا وهناك عشان يأمن مستقبلهم وفي نفس
الوقت من كتر ما ييجري ورا الفلوس ميلقيش وقت يعقد معاهم مثلا ولا يتكلم
معاهم ويبقى معاهم اب مع وقف التنفيذ لمجرد ان حبه ليهم بقى فلوس

وفي ناس تجمع في قصور وعرييات ومش بتشبع دائما والسبب في دة شهوة ..
شهوة ملهاش شبع .. شهوة متعرفش النوم المرتاح ولا السعادة الدائمة .. تعرفوا
مشكلة الفلوس الوحيدة اية ؟ .. انها ملهاش اى تلاتين لزمة واحنا اللي بنخلي
ليها الف لزمة .. تخيلوا كدة دنيا مفيهاش فلوس وكل واحد عنده اللي يكفيه من
اكل وشرب له ولاسرته .. كان يبقى ليها لزمة !!؟ .. اكيد لا .. لكن اللي خلق
الحالة هو الجشع .. و مش غريب ان نسبة الانتحار اكبر بين الاغنيا عن الفقرا
لان ببساطة سر السعادة مكش في الفلوس لكن في القنوع والرضا ويمنعش ان
في ملايين في السنة ييموتوا من الجوع وكانت الفلوس بقت هي الحياة ليهم لو

كانت فى ايدىهم .. بس فى النهاية الكل مش هياخد غير شوية تراب فوق تابوته
.. ولو كانت الحياة بقت فلوس للبعض يبقى السبب فى دة ناس كتير اوى جشعة
وناس كتير اوى مظلومة بسببهم لكن مش عشان حقيقة الحياة هى الفلوس

فى ناس تانية حياتهم هى الشغل وفى ناس تانية حياتهم هى الكيف وفى ناس تانية
حياتهم هى الشهوة وفى ناس حياتهم هى الوطن .. فى انواع كتير اوى من
.. التعريفات اللى بتختصر معنى الحياة لناس كتير اوى معنا على نفس الكوكب

لو سألتنى أنا .. الحياة لو عاوز معنى مثالى ليها اسال عنها العصافير

شوفوا كدة الفئة دى :. الحياة عندهم خبرة وحكمة ماضى مع استمتاع واستغلال
حاضر مع حلم وتخطيط مستقبل ، والصلة ما بين كل النقط اللى فاتت هو ربنا
وضحكة وإيمان وأمل .. حياتهم مش بيوقفها جروح .. حياتهم اكبر من معنى
واحد تختصر فيها الحياة اللى اهم وزنة اداها ربنا للبنى ادم بانه يعيش .. وهو
اوقات بيعيش ميت .. حياتهم حياة عصافير

حياة العصافير مافيهاش جشع مافيهاش كسل مافيهاش قلق ، يصحى مع نور
الشمس بأمل ويشغل بغنا وفرح و يجيب رزقه له ولعصافير عشته وبدون جشع
وبدون ما ياخد اكر من حاجته ومسلم قوى لربنا بانه رزقه زى ما جة النهاردة
هيجى بكرة ، ولو رزقه قل او فى يوم شاف الخطر يقدر يطير لبعيد قوى وبكل
الثقة فى ان بكرة احلى

أظن أجمل إجابة لسؤال اية هى الحياة؟؟ ... متسمعهاش من بنى ادم لكن اسمعها
من عصفور ... عصفور بلكونتي فضل عايش حياة وسطنا بدون قلق وبدون
جشع وبكل سعادة وشجاعة وغنا .. وفى يوم لما قررنا ندهن شقتنا ومن ضمنها
البلكونة .. كان لازم ياخذ قرار الرحيل .. وفعلا طار بعيد .. بس مكش خايف
، طار وهو بيغنى .

وصرخ الحمار غاضبا " يا بنى آدم "

تعريف الشتمة هو انك توصف حد بصفة تغلغل من شأنه بداية من غيى لحد يا
ابن ال وزى ما تحب مكان النقط

بس فى شتلم انا معترض عليها بعيدا عن ان الشتمة غلط فى حد ذاتها ومرفوضة
.. يعنى فى شتلم مستفزة ليا ، معرفش ليه تعايشنا معاها على انها شتمة زى اننا
نشتم بعض بالحيوانات ، مع ان اللى خلقنا خلقهم ووضبهم احلى توضيب
وباحلى اشكال وباجمل الوان

صحيح يعنى البنى ادم الحلوة اللى ربنا خلقه فى احلى صورة مخلوق فى يوم كامل
بحساب زمن ربنا .. بس برضة الحيوانات ربنا خلقهم فى يوم كامل زى البنى ادم
واهتم بتفاصيل تفاصيلهم وبدرة حياتهم وباشكالهم وبالوانهم وبمعاشتهم وبكل
حاجة خاصة بيهم .. هو اة ربنا خلق الدنيا دى كلها عشان البنى ادم يبقى
مبسوط ومرتاح بس مش معنى كدة انه ظلم الحيوانات مثلا .. بالعكس ..
الطبيعى ان الكون كله يكون ماشى بنظام مافيش فيه مخلوق مظلوم .. الكل
يعيش مستفيد ويفيد .. دة المفروض يعنى

بس نرجع للنقطة الاساسية بقى ... يعنى ناخذ مثال : مثلا نشتم بعض ونقول
لفلان انه حمار

يعنى المفروض بناء على ان حمار دى شتمة يبقى المفروض الشخص دة اعلى شأننا
من الحمار وعشان عاوزين نشتمه ونقلل من شأنه فنقوله يا حمار ..

بس انا مثلاً عمرى ما شوفت حمار بيكذب على اخوه الحمار .. ولا حمار يبخون
حمار .. ولا حمار ييغش حمار .. ولا حمار يقتل الحمار الللى زيه الللى من لحمه
ودمه .. ولا حمار يسرق تعب ومجهود حمار تانى .. وبعدين الحمار كل يوم بيتعب
وبيتشغل .. ومشوفتش حمار مثلاً راح أدير كدة لصاحب الشغل فجأة وقاله
الحمل ثقيل يا عمنا هو انتا هتبيع وتشتري فى الللى جابونا ويقوم سايه ويدور على
شغل تانى .. بالعكس بيشيل ويستحمل فى منتهى الضرر لحد ما يوصل ..
مشوفتش حمار بيكسل فى شغله ويقول معلش اصل عندى وعندى .. واحنا
استاذة ظروف .. ومسمعتش انه اعترض على نعمة ربنا فى يوم وقال كل يوم
برسيم برسيم مافيش لحمة .. واحنا استاذة تمرد

وبعدين الحقيقة برضة ان فى مميزات كتير فى حياة الحمير مش فى حياة البنى ادمين
.. يعنى اى حمار لما يحب حمارة معندوش اى مشكلة فى انه يصارحها بتهنية
والموضوع يخلص

لكن فى عالمنا الموضوع معقد ..

يأما يفضل يتكلم معاها بطريقة غير مباشرة وهى تفضل تستنى المصارحة لحد ما
يطلع لها دليل من الانتظار ... يأما هو يصارحها وتقوله هى بقى افكر وتقتل

وناسية ان فى مشكلة عنوسة طائلة نص بنات مصر
وىوم ما رينا يكرمهم والامور تمشى لبر الامان ويتخطبوا ، تلاقى المطلوب بقى
منك خروجات وفسح وهدايا ، وبعد كدة تبدأ المرحلة الاخطر فى الخطوبة من
التجهيز للوازم الجواز من شقة وعفش ، ولو رينا عداك منها كمان تتصدم بمرحلة
ما بعد الجواز اللى مش عاوز اكتب عنها عشان مزودش فى ازمة العنوسة اكتر و
ابقى بشجع على التوحد او الرهينة او العزوية

لكن كل دة مش موجود فى حياة الحمير لان الموضوع سهل والهدف واضح ..
عاوزين جحش يملى عليهم الزريبة ويعيشوا مستورين

انا اظن لو الحمار عرف اللى بيحصل فى البنى ادم واللى بيعمله البنى ادم فى اخوه
واللى ييشوفه البنى ادم عشان يعيش وعشان يحب وعشان يتجوز .. كان يوم ما
حمار يزعل مع حمار تانى .. مع ان دة نادرا جدا لو حصل .. كان صرخ فى وشه
ويعتمهى الغضب و قاله : " يا بنى ادم "

عبادة الاصنام

فى ناس فى منتهى الغباء بأنها بتراهن فى سباق الخيل على حصان مدخلش السباق
أصلاً!!

تعريف الأصنام هى تجسيد مادی لصورة إله
بعيدا عن الشخايط اللى ممكن تتطلع بيها من التعريف انا هتكلم عن حالة تانية
من الأصنام

أظن سبب قوى من ظهور الاصنام هو الإحتياج ... الإحتياج للحب وإن فى حد
يحبك والحد دة كمان يكون قوى جدا وصاحب نفوذ وسلطة ويقدر يعمل
عشانك حاجات كتير اوى تفوق قدراتك وتكمل عليه وتقدر تهرب ليه من كل
... همومك ومشاكلك وتفضفض معاه

والامور متشابهة فى العبادة مهما كانت الديانة سماوية او غير سماوية لحد دلوقت من
حيث الغرض ... الحاجة هى اصل العبادة ودى الحقيقة اننا كلنا بنحتاج ... لان
الانسان مخلوق مش كامل .. يعنى ناقص .. يعنى محتاج للى يكمله ... والكامل
الوحيد هو الاله وعشان كدة احنا بندور على ربنا عشان يشبعنا لاننا محتاجين وفى
الله نحقق الكفاية

بس لاننا اوقات كتير مش بندور على ربنا مع اننا عارفين ان الله يحقق احتياجاتنا
بس بنستهيل ... ولاننا اوقات كتير بنهرب من ربنا وكأننا نقدر نهرب منه لما

بنعمل حاجة غلط عشان حاسين اننا ما نستهلوش ... ولاننا اوقات كثير بتوصل
الضلمة فى قلوبنا لمرحلة حرجة باننا منبقاش شايفين ربنا كحل من الاساس ...
خلقنا حالة مؤسفة جوانا اسمها الاصنام

صنم الاستسلام ... اصعب موة سمعت عنها هى انتحار ارادة ... معرفش ازاي
بنوصل للمرحلة دى من الضعف باننا نستسلم ونحبط ونكتئب ... وتتحول كل
الطاقات فينا لسلبية فى مشاعرنا و جمود فى عضلات احلامنا و برود فى ارادتنا
... صنم الاستسلام اللى طقوسه عزلة ووحدية وعبارات الصلاة فيه زى انا عاوز
اقعد لوحدى ... وانا اساسا فاشل ... وانا منفعش فى اى حاجة ... وخدنى بقى
يارب ... مع لبس الالوان الغامقة طبعا .. وشارات سودة لو عاوز .. صنم
عجيب بنعبده بدون ما نحس ... بنهرب للصنم دة مع الفشل ونقول العبارة
المشهورة " هو دة اللى اقدر عليه ومعرفتش " وتتحول الحالة اللى بتخلينا المفروض
ندور على ربنا والحالة اللى المفروض فيها ندور على بكره والحالة اللى مفروض فيها
ندور على نور ... لحالة بتخلينا ندور على اننا نكون احنا والوحدة اصحاب والحالة
مافيش فيها غير ذكريات وماضى وبكا على اللى راح ... صنم الاستسلام من
اسوأ الاصنام ... لو عرف توماس اديسون اللى اخترع المصباح الكهربى بعد الف
محاولة اننا استسلمنا بعد محاولة او اتنين كان زمانه مات من الضحك

صنم الصمت .. الصمت فعلا فضيلة وانا معنديش اى اعتراض على ان الصمت مفيد فى اوقات كثير ...بس الصمت لما يوجعك يبقى مش فضيلة لان مافيش فضيلة بتجرح ... ساعات بنختار الصمت دة عشان مافيش حد مستعد يسمعنا ... والمشكلة اننا كلنا عندنا نفس الاحساس دة من ناحية بعض ... بس لو بصينا مهدوء على الصورة من برة هنلاقى اننا كلنا محتاجين نتكلم ونفضفض ولو كل واحد فينا ادى للتانى فرصة انه يحكى .. وبالتبادل .. هنلاقى اننا نقدر بسهولة اوى اننا كلنا نسمع بعض ... ساعات بنختار الصمت لاننا فاهمين البساطة غلط ... فاهمين ان دة الحل السهل مع ان البساطة الجميلة هى الصراحة اللي مش بجحة فى اسلوبها ... كام واحد فينا ضيع فرصة كلام حلو يقدر يقوله لواحد بيعجبه اوى قبل ما يفارقه .. كام واحد فينا ضيع فرصة كلام يفوق صديق له بعتاب مليون محبة قبل الخلاف ما يكبر و يخسره .. كام واحد سكت عن حق لمجرد انه شاف ان الصمت هروب وشبع .. حس فى الصمت ارتياح بس للأسف ارتياح غيى لانه اذاه ولو مش دلوقت هيكون بعدين

صنم الخوف ... فى نوعين من الناس نوع بيعيش على الهامش ونوع بيعيش فى نص السطر .. جايز تكون ظروف الحياة اوقات اقوى منك ويبقى ليك عذر في انك تكون على الهامش ... جايز لفترة محددة يفضل العذر دة مقبول ... لكن فى ناس تبقى حياتها كلها على الهامش طب ازاي !!! ... كلنا بييجيلنا فرص نعيش

فى نص السطر وبنرفض لاننا قابلين فكرة ان العيشة جنب الحيط امان ... لكن
العيشة جنب الحيط عيشة ضيقة مافيهاش براح لكره مافيهاش مساحة لحلم ومش
مقبولة لكرامة واحد خلقه رينا فى احلى واجمل صورة .. رينا خلقنا عشان ييقى
لينا وجود وثبت وجودنا ونعيش فى نص السطر لان لو الحكاية اتنا نفضل على
الهامش طب مكنش خلقنا بالاهتمام ده ولا ادانا فرصة نعيش على الارض
الواسعة دى مدام كدة كدة هنبقى راضيين بالقعدة جنب الحيط وكان خلق الارض
اوضة وصالة

الاصنام دى احنا اخترناها لاننا حاسين انها قوة وحماية واسهل فى اللجوء والستر
لينا وتدارى عيوبنا وعجزنا لكن الحقيقة هى بتفضحنا

مشكلة اللى بيعبدوا الاصنام اللى فاتت انهم اختروا يراهنوا فى سباق حياتهم على
حصان خسران مش فى سباق الحياة اصلا ... لان الحياة متقبلش لا الاستسلام
ولا الصمت السلبي ولا الخوف ... الحياة ارادة وحقيقة ومغامرة

جواب لحبيبتى اللى لسه محبتهاش

تحية طيبة وبعد..

أنا بيعتلك جواب دلوقت وأنا قاعد قدام اللاب فى الأوضة لوحدى وبعد ما فكرت ووصلت لقرار انى مش هفضل قاعد لوحدى كدة كثير .. اتخيلتك وقررت اكتبلك جواب .. ودى اول مرة فى حياتى افكر انى اكتب جواب .. انا مش متأكد من هويتك وانتي مين وشكلك اية وقلبك عامل ازاي .. بس انا متأكد انك حبيبتى اللى لسه محبتهاش ووحشانى .. وأنا دايمًا اتعودت لما احب اعمل حاجة اعملها حتى لو كانت فى نظر غيرى مجنونة لكن هتسعدنى لو عملتها .. حبيبتى اللى لسه محبتهاش وحشتينى .. حالة كدة

لو من أولها كدة ناوية تقولى مجنون .. معنديش اعتراض .. انا أصلاً تقدرى تقولى مأجر ناصية كدة على أول سحابة على إيدك اليمين وانتي بتبصى من شباك اوضتك .. انا حالة مختلفة فى التعامل ولما نظرة ثانية فى الحياة .. ودة هيخلي حياتك مختلفة من لحظة ما احبك .. متفكرش ان دة تشجيع او استدراج لكن انا بنبهك من اولها انك هتجى واحد مجنون فعلاً وانتي ونصيبك صحيح يقولوا عليا انى بكتب حلو اوى ويقول شعر بيعجب ناس كثير لكن مش معنى كدة انك مرتبطة باحد بيه شوقى ومتحطيش فى دماغك ان كل مقابلة او

كل مكالمة مطلوب منى اقولك ابيات شعر .. الفكرة في ان الكلام يخرج من القلب .. وانا قلبي قادر يخليكي تحسى بنبيض الحلم وبلون الورد وبدفا الشمس .. انا ممكن اقولك احلى كلام في الدنيا بس لو محستوش يبقى زى الذهب الصينى .. انا قلبي اللي هيتكلم وبصراحة مش متأكد من موهبة الشعر في قلبي زى اللي في عقلى ولا لأ .. بس انا اللي متأكد منه ان قلبي مختلف .. انا قلبي طفل ييشوف الدنيا بسيطة وقت ما الكل بيعقد .. انا يوم ما وقعت وانا نازل من على السلم قولت الحمد لله وصلت بسرعة .. انا وقت ما الكل ييشوف الضلمة انا يبقى الواصل في نور بكره اصل وقت ما الدنيا تغم بشفوف ورا السحاب نجوم مستنية وشمس بتضحك مستخبية .. انا قلب بيعب المغامرة ملوش في الروتين وميعرفش يعنى اية عادى واكثر كلمة بضايقه هي " صنع في الصين " .. انا قلبي طريقه الضحكة ولو في يوم اضايقت او زعلت كأن الفرحه بتشحن في اليوم دة وارجع اقوى من الاول .. انا عندى الحزن حادثة عابرة في الطريق لكن طريقى هو الضحكة .. انا متأكد جدا ان لحظة ما قلبي يجيك مش هتفرق معاه الكرة الارضية باللى عليها لان بداية ونهاية الكرة الارضية بالنسبة ليا ساعتها هتبقى وانا بين ايديكى

احنا مش لازم نكون زى بعض في الطباع ولا نكون بنسمع نفس المزيك ولا تكون نوعية افلامنا واحدة .. هحاول اقبل فكرة انك ممكن تتطلعى زملكاوية مثلا وانا اهلاوى .. بس تشتمى في ابو تريكة لأ .. معنديش مشكلة ان اسمع معاكى

برامج الطبخ .. لو دة هبحسن من مستواكى .. ومعنديش مشكلة اسمع كل
برامج المرأة والافلام الرومانسية .. هشاركك فى كل حاجة بتحيتها .. بس من اولها
كدة ماتشات دورى ابطال اوروبا وماتشات المنتخب لو فى نفس التوقيت لازم
اشوفها .. ومعنديش مشكلة انى اسمع المسلسلات التركية مع انى هحبك احسن
من الدراما اللى فيهم بس حسك عينك تقوليلى اتا ليه مش وسيم زى مهند ..
احنا رجاله بشنبات .. عموما الرجولة انى اخليكى تعملى الحاجة اللى انا عاوزها
وانتى مبسوطه

برضة انا متأكد من ان فى حاجات مشتركة هتبقى ما بينا .. وبينى وبينك حاسس
ان " الجنون " هيبقى من الحاجات دى ودى حاجة بسطاني انى الاقى حد عنده
المركز دة فى دماغه .. بس من اهم الحاجات اللى لازم تجمعنا هى " ربنا " لاني
مش متخيل اننا نبقى سوا بدون صاحب اعظم حب وبدون اللى خلق لنا
القلوب اللى خلطنا نتلاقى ونحب بعض .. ومن الحاجات الاساسية هى الصراحة
ومينفعش تخبي عليا اى حاجة وانا هبقى مبسوط وانا بسمعك .. ولو راجع من
الشغل هل كان ومحتاج انام عاوزك تحكيلى تفاصيل تفاصيل يومك ومش هسرح
لحظة .. بالنسبة ليا انى اسمع الشخص اللى بحبه زى اكل الشيكولاته بمزاج او اسمع
موسيقى لعمرى خيرت بمنتهى الاستمتاع
مقدرش اقولك ان عيني مش هتبقى زايغة .. الحقيقة ان مافيش راجل فى الدنيا

عينه مش زايغة .. ولو الوالد قالك انه معملههاش وبص لحد تانى فى حياته غير
والدتك احب اقولك بابا كذاب .. وحقكى كذاب برضة لو حب يستعبط
عليكى فى النقطة دى .. مش بقومك عليهم ابدا بس كل الرجاله عينيه زايغة ..
لكن الاهم عيون القلب .. والحقيقة ان عينينا بتزوغ اوقات عشان متبقوش تقال
علينا .. يعنى تقدرى تقولى بنحب غيرتكم علينا .. هتبقى اجمل لحظة فى حياتى
وانتى بتتحولى لريا وسكينة وتقوللى هقتلك لو بصيت هنا ولا هنا .. انا عاوزك
برضة تبقى واثقة من نفسك لانك حلوة جدا فى عيونى

واسمحلى اخليكى مغرورة واحطلك بنفسى الريشة فوق راسك .. انا عارف انك
هتقولى برضة ساعات طب موافقة بس انا برضة عيني هتزوج .. احب اقولك انى
غيور جدا وصحيح جزء من الغيرة بيبقى سبيه كبرياء فى الحب .. بس انا برضة
هغير من خوفي عليكى .. عموما انا عارف انها هتفضل المشكلة ما بينا وانا
مبسوط بدة لان الحب احساس غير ديمقراطى بالمره .. بس انا مش قلقان لان
الحياة السهلة ممله والحياة حلاوتها فى مشاكلها .. بس ياريت تراعى غيرتى وخوفى
عليكى .. يا حبيبتي انتى لو حصل فى يوم اصلا بعد الشر رجلك اتكسرت انا
قلبي هيبقى فى الحبس

بالنسبة للمشاكل بما انا جنبنا سيرتها .. انا معنديش مشكلة اننا نتخانق .. بس

لو يوم عدى واحنا مش متصالحين تبقى كارثة .. ازاي اتنين يحبوا بعض يعدوا يوم
وهما زعلانين فيه من بعض ! .. احنا مفروض بقينا شخص واحد ازاي في شخص
واحد تلاقي القلب متخاف مع العقل مثلا ومش ناويين يتعاملوا فيه مع بعض لمدة
يوم يومين لغاية ما يصفوا؟! كدة الشخص دة يموت وانا مش هسمح لحبنا
للحظة انه يبقى مهدد بالنقطة دي .. انتي في الاصل مخلوقة من حنة منى لكن
حاليا انا كلي منك ومينفعش نبقي متفارقين واحنا في بيت واحد .. ولو مش
عارفة تصالحيني ازاي سبي عليا البداية انا هقدر " انكوشك " ودة فعل حب
مليان رخامة عشان اخرج منك ضحكة لان ضحكك هي فرحتي .. بس عموما
ممكن اغششك بداية للتصالح وتأكدى انا هضعف .. من اولها بفشى اسرارى ..
اعمل نفسك عيانة .. يعنى تأكدى لو استهبلت فيها وعملت نفسك تعبانة فعلا
هجي اقعد جنبك وامسك ايديكى وابوسها واقولك الف سلامة يا احلى حاجة
حصلتلى مع ابني هبقى واثق تماما من استهبالك بس اعمل اية .. بجهك .. انا
موافق على عيشة توم وجيرى في اجزاء في اليوم بس معنديش مشكلة اني ادى
فرصة لقيس وليلى انهم ياخدوا حقهم في حياتنا برضة

انا من عيوى ابني رغاى اوى جايز تكوني لاحظتي دة من الجواب بس اعمل اية
متي وحشاني .. انا لولا ان بطارية اللاب قربت تفصل كنت كملت وقولت اكرر
.. بس عشان لازم يبقى في مفاجات لان كل اللي قولته اكيد مش بس طريقي في

الحب .. وعشان الكلام مش هو الحب لكن الفعل هو الاهم .. انا هكتفى باللى
قولتهولك واستمر فى حلمى بصوت الاغنية الهادية مع دايرة من الوشوش اللى
بتضحك وانا وانتى فى النص بنرقص رقصة حبتنا

تصبحى على خير

الحلم صح

ناس كثير اوى بتفتح شباكها بمنتهى الامل .. لا النور بيدخل ولا الضلمة بتطلع ..
حالة كدة من ناس مبيعرفوش يحلموا

عارف يعنى اية تحلم ؟ .. يعنى عصفور ملوش عش ووطنه سما مفتوحة .. الحلم
حرية

يعنى فراشة فى لحظة لمسها للوردة متعرفش مين اتمايل على مين ولا مين بيعشق مين
اكثر .. الحلم حب

يعنى شعاع شمس خارق اوى مافيش سور ولا شيش يمنع من بيت قلبك .. الحلم
قدرة

خليك حر فى حلمك وحب زى اول مرة تحب وحرك كل مشاعر قلبك ناحية
حلمك واعشقه وامن انك تقدر

الحلم ضحكة .. اضحك .. الحلم يحب الضحكة .. مش بس الصور اللى
بتبان حلوة اكثر مع الضحكة .. كاميرا الحلم بتحب الضحكة .. حاول تفهم ان
مافيش حلم من غير ضحكة .. وازاى نبني بيت ومافيش اساس .. الضحكة
اساس لبكره وعنوان لانك بنى ادم طبيعى عارف انه محبوب من ربنا الهه القوى
اوى ومتفائل ان قوة ربنا دى مش هتفارقه لحظة .. معرفش ليه ظالمين نفسنا فى

قضية اسمها الكذب .. هو يبقى كذب لما اتبسم زعلان !!؟ صديقى لما تبسم

زعلان بس تكون انتسامتك حقيقة يبقى انتا مؤمن

الحلم معرفة .. مافيش حلم من اول نظرة زى مافيش حب من اول نظرة غير فى

الافلام .. بستغرب اوى من احلام ناس لسه مش عارفة نفسها ومش مكتشفة

قدراتها .. منين نجيب تتر المقدمة لحلمك والنص له وانتا مش عارفك .. مين

البطل وفين السيناريو .. اعرف نفسك عشان حلمك يعرفك .. ساعات الاحلام

بتقابلك مش بس انتا اللي بتروحها .. وتانى حاجة لازم يبقى تفاصيل البداية

لحلمك موجودة .. مش شرط تبقى كاملة .. بس تبقى شايف اول سلمة ..

عشان تروح فى الاتجاه الصح .. وتالت حاجة اعرف اكثر عن الدنيا اللي

احلامك فيها ... اتعرف اكثر على اللي اوجده ربنا من ملايين السنين بمنتهى

الدقة وبمنتهى الحرفية عشان تفهم اكثر وتكتشف اكثر ... اتعرف اكثر على عقول

بشر سبقوك فى احلامهم وعرفوا يوصلوا .. عرفوا يحلموا صح ويحققوا

الحلم وقت .. فتح شباكك بمنتهى الامل لا النور دخل ولا الضلمة طلعت ..

عارف انى كتبتها تانى بس طب مش هوا كان عنده الامل طب ليه محصلش

النصيب؟؟ .. اوقات الشمس بس لسه مطلعتش .. لسه مقررتش تدخل بيته

حالا وفورا .. بس هتدخل فى وقتها .. متستعجلش .. دايما يقولوا الحاجات اللي

بتجى بسرعة بتروح بسرعة .. خلى حلمك براحتة .. اعمل اللي عليك واستنى

نوره يدخلك .. امن بس

الحلم بكرة .. مش معلومة جامدة انا عارف ، هو يعنى فى احلام بتحصل امبارح
!؟ .. اكيد مش دة المقصود .. بس ازاي يجي الحلم لواحد خايف من بكرة ..
ازاي يجي الحلم لواحد مش عايز بكرة .. اوقات بنعين بكرة فى صندوق اسمه
الصدف ... اوقات بتركن بكرة جنب حيطه اسمها مافيش فائدة .. اوقات
بنسجن بكرة فى سجن رفض ونقول لبكرة كش ملك باسم ماضى وامبارح
وذكريات كلها مشاكل وهم .. الحلم مبيجيش غير للى عاوز بكرة واللى مش
خايف من بكرة .. حتى لو كان فى بكرة عفريت فى ايدك انك تصرفه بشوية بخور
امل على شجاعة .. بكرة متسندوش على كلام ايمان جواه زيف وخداع لنفسك
.. تقول مسلم لربنا وانتا عنصر فلز خامد بيعلم خيال ومافيش محاولة ..
عضلات حلمك بتقوى اكرت بالمحاولة .. الصدف ليها نصيب فى حياتنا بس مش
هى حياتنا

الحلم النهاردة .. اة اوقات ببقى متناقض .. من حقى ... مش كتانى؟! .. لا لا
حقيقى فعلا حلمك هو النهاردة ، بناخد درس فى المدرسة من اولى ابتدائى واسمه
" لا تؤجل عمل اليوم الى الغد " ، الحلم جايز يكون بكرة ميعاد مقابلته لكن
ازاي تروح المقابلة وانتا مش جاهز !؟ .. لازم تلبس احلى لبس استعداد عندك ..
احلى طقم من اللى فاتوا دول مع عطور امل مصنوعة فى باريس الخيال .. التفكير

في حلمك يبدأ من حالا

من الاخر كدة .. دولة الاحلام مساحتها التفاؤل .. عاصمتها الامل .. نشيدها
الوطني الضحكة .. اشهر معالمها الحرية والثقة والحب .. كون مواطن فيها واحلم

حياتنا ألوان

"لو كان للألوان لسان كانت متأخرتش للحظة فى إنها تشتتنا"

كان من الممكن جدا ان ربنا يكتفى بالابيض والاسود ويبقى العالم كله كدة وخلاص .. بس مدام ربنا اللى يفهم جدا وادراك حكمته يصعب على اى بنى ادم مننا انه يستوعبه خلق الالوان .. يبقى له اهداف كثير اوى ..

الالوان هى الحياة .. الالوان هى لغة التخاطب اللى بتكلمنا بيها الطبيعة ..

الالوان روح وسحر .. مش مجرد نتيجة لفرشة رسام والسلام .. الالوان هى نعمات الدنيا اللى بتعبّر بيها عن شخصيتها ونفسها .. الالوان هى النعمة الكبيرة اوى فى توضيح جمال الدنيا وحقيقة الاشياء

انا مش ببالغ لما اتكلم عن اهمية الالوان وعن انها محتاجة لتأمل كبير اوى مننا فى حياتنا .. قوس قزح " قوس الالوان " اللى بيظهر فى السما بعد الشتا هو لحد دلوقت علامة الامان لينا .. بيفكرنا بالوعد اللى اداه ربنا للبشرية بعد الطوفان .. هو اكبر دليل على ان الالوان فيها قدرة .. قدرة كبيرة انها تنقلنا ، تطمئنا ، تغيرنا ، تفكرنا ، تهدينا ، تحركنا .. الالوان زى الموسيقى .. بتوصل للقلب والعقل والروح بس للى يديها الفرصة

ارجوك اتعامل مع طريقة سردى للالوان بقلبك وبروحك اكثر من عقلك على اد

متقدر

الابيض .. لون الصفاء .. لون الحياة الاول لانه اللون الوجودى .. لون مجد الله .. لون الملائكة .. هو النور .. النور اللى بنحتاجه فى قلوبنا اللى بتغطيها الوان كثير تانية من المشاكل والظروف .. مجرد انك تخليه يتسرب جواك .. يتحرك بين صخور يأسك وهمك وقلقك وتعبك وخوفك ويدخل لعمقك .. احساس بالراحة بيتولد جواك مع إيمانك بيه .. لانه إيمان بالنور .. لانه إيمان بوجودك .. لانه إيمان بالحياة .. الابيض هو لون الحقيقة .. الحقيقة الواضحة اللى مش محتاجة لاي مغلطات او اى تداخلات من اى لون تانى .. والجميل ان لون الحقيقة نفسه هو لون الفرحة .. لان الحقيقة فرح بس للأسف احنا خلينا الحقيقة صعبة ومختلفة عن الحقيقة المطلوبة .. الطبخة بقت شعارنا فى تفاصيل حياتنا عشان كدة النتيجة ان لون الفرحة مبقاش قوى زى الاول فى قلوبنا .. مش قولتلك لو للالوان لسان كانت شتمتنا

الاسود .. لون الظلمة .. لون الصمت .. لون النهاية .. هدف وجود اللون دة فى اعتقادى هو اننا نخلى بالناس من معنى عدم وجود الله فى حياتنا .. حالة مختلفة بتولد مع اللون دة .. حالة مليانة حزن و احباط .. حالة مليانة خوف ومليانة شر .. عارف يعنى مبقتش بتشوف؟؟ .. يعنى الاسود .. مقصدش الشوف دة اللى هو النظر بالعين لكن النظر بالقلب .. خطر جدا ان قلبك ميشوفش .. ميشوفش الناس وحياتهم وظروفهم ومشاكلهم .. ميشوفش الاحساس والمشاعر والحب .. احنا اتعاملنا مع الاسود بلون فساتين السهرة .. وبقي ليلنا سهر .. بقي ليلنا اللى مفروض انتظار للصبح .. بقى فرح بالاسود .. متفهمش غلط بانى بهاجم فساتين السهرة السمرة او بدل الرجالة الشيك السمرة فى عز الليل .. لكن

انا بهاجم فكرة اننا نسينا ان الاسود رمز ، رمز مش بناخذ بالننا منه في تطبيقه في حياته ، مش بناخذ بالننا من انه تحذير بعدم وجود النور في حياتنا اللون الاحمر ... اللون دة عجيب في طريقة تفسيره وتعاملنا معاه .. لون الدم يبقى لون الحب طب ازاي؟؟ .. جايز لان ببساطة ان الواحد لما يبحب يجد بيبقى مستعد يضحي بحياته عشان خاطر اللي يبحبه .. ولون التضحية هو الدم وبالتالي يبقى الاحمر لون الحب ولون التضحية .. بس في نفس الوقت يفضل لون الدم .. يفضل لون الصراع .. يفضل لون يعبر عن النضال والكفاح .. مش حاجة غريبة ان ثورة زى الثورة الشيوعية تاخذ من الاحمر كرمز ليها .. ومش حاجة عجيبة باننا نحتفل بالفالتين باللون المفضل الاول للتعبير عن الحب اللي هو اللون الاحمر .. بس لاننا كالعاده بنحب نخط " التاتش " بتاعتنا .. قررنا نحقر من اللون دة بطرق مختلفة على اد منقدر .. بداية من ان لون الجاذبية بقى لون الشهوة وبقينا بنلقب قعدات الفجور والدعارة بالسهرات الحمرا .. وبانا للاسف اختصرنا اللون الاحمر اللي مغرقة الطبيعة بتاعتنا في مؤخرة القرد وقررنا نعتبر ان " حمرا " هو رد الشتيمة الطبيعي لاي حاجة متعجبناش ونرفضها اللون الاصفر .. لون التناقض في حياتنا .. عجيب ان لون ضحكة الشمس ولون لمعان الذهب يبقى نفسه لون المرض ولون الخريف ولون موت الطبيعة ولون الصحرا .. وعشان كدة اظن بدون وعى بدأنا في استخدام " الابتسامة الصفرا " تعبير عن تناقض الضحكة مع حقيقة قلب الشخص .. من الطبيعي ان اللون دة يدفعنا للتفاؤل لانه لون الشمس لكن لاننا مش بنقدر قيمة التفاؤل والنعم الموجودة في حياتنا بشكل صح اظن ربنا نفسه خلى لون الصحرا ولون المرض

ولون الخريف يبقى نفسه لون التفاؤل عشان يفهمنا احنا ليه بنتفائل .. عشان يفهمنا من انه موجود وحاضر .. وان نفسه خالق الخريف هو صانع الربيع .. وانه نفسه اللي سامح بتجربة المرض هو نفسه اللي يقدر يشفى .. وان نفسه اللي وجد الصحرا خلق المياه .. ربنا يفهمنا من اللون دة ازاي نتفائل وليه بنتفائل .. بس لاننا مش وش نعمة قررنا ببساطة اننا نخلي اللون دة رمز للجنون ولقبنا مستشفى المجانين بالسرايا الصفرا .. واعتبرنا لون التفاؤل لون التخريف .. عالم كثية

اللون الازرق .. لون الفضا الواسع .. لون الطموح .. لون بكره .. لون السما البرئ في افكارنا .. لون موج البحر في حركة مشاعرنا .. لون الصداقة اللي يجد واللي ساعات بتختلف درجاتها زى ما درجات الازرق بتختلف وتتغير .. لون الهدوء والراحة اوقات لما نحب نصفنا بقلوبنا بنبص في السما .. لون الانتعاش والحيوية .. لون واضح مليان نראה ومليان جد .. لون مفهوش تحريج في قدرته الكبيرة اوى على نقلك لعالم تاني .. عشان كدة بعتره هو لون الاحلام ... مشكلتنا اننا مش بنفهمه ومش بنستوعب حكمة وجوده .. بطلنا نعلم .. بطلنا بكره .. بطلنا انتعاش وحيوية ... عشان كدة من الطبيعى ان لون الكدمة بعد اى خبطة يبقى ازرق .. عشان نفهم ان الحياة لما تحبطننا باى مشكلة او ضيقة مش نترمي في الاسود لكن جسمك نفسه بيلون ازرق عشان يقولك انتعش وارجع ... في بكره لسه ... في لسه امل .. في لسه حلم .. بس اوقات كثير ببقى لا حياة لمن تنادى

اللون البرتقاني .. لون ما بين النضال والتفائل .. الاحمر والاصفر ... وعشان
حياتنا اغلبها نضال ... بحسه لون بيضحك ... شمس بتحضنك بشعاعها
وبطمنك .. بتقولك صارع زى مانتا عاوز فى حياتك وما تخفش .. تفائل واضحك
لان ربنا موجود ومعاك ... وزى ما بشوف فى البرتقاني الضحكة بشوف فيه الحرية
.. حرية انك تمارس حياتك بمنتهى الاستقلالية ... حرية انك تضحك وتعيش
غصب عن اى ضلعة تجربة او ضيقة .. لون مصمم يفرض وجوده على الحياة
بقوته .. لون يشجعك تحب الحياة أكثر .. مش صدفة عجيبة ان دكاترة التغذية
يوصفوا اللون البرتقاني بانه لون فاتح للشهية ... لانه لون مليون حياة .. احنا
بتعامل معاه اوقات بكراهية ومش بنفضل وجوده .. وبنعتبر اللون دة فعل فاضح
فى اوقات كثير فى لبسنا وفى تعاملنا معاه ... مش غريبة اننا نفكر كدة ساعات
لانا ساعات بنخاف الحرية وبنخاف نضحك وساعات بنشوف الحرية والضحكة
فعل فاضح

اللون الاخير اللى هتكلم عنه هو اللون الاخضر .. حبيت اختم باللون المفضل
للطبيعة ... اللون الاخضر هو اللغة الرسمية للحياة ... اللون الطاغى على جنة ادم
وحوا .. لون من الوان النعمة ... النعمة اللى فرطنا فيها .. ولحد دلوقتى بتعامل
مع سبب من اسباب استمرار حياتنا بمنتهى الاستهتار وهى الغابات ... مش
مستغرب ان لون الجنة اللى خرجت منها البشرية مطرودة يكون اللون الاخضر
انعدامه سبب فناء البشرية من على سطح الارض فى اواخر الايام ... غياب اللون
الاخضر معناه الخطر ... وكل ما قل الاخضر فى الارض كل ما زاد الشر فى
قلوبنا

احب اقولك فى النهاية ان الالوان رسالة فى حد ذاتها لكل واحد فينا .. جايز
تشوفها بافكار تانية مختلفة عنى ودى حاجة تبسطنى ... بتسطنى لانك بتفكر ..
جايز انا اغير كلامى قدام وتفهمنى الحياة حقايق تانية عنها وعن الوانها واقتنع
بكلامها .. المهم اننا نفكر ونفهم ان الحياة بتكلمنا بالالوان ...
بعد اللى قولته اظن اقتنعت بالمقولة الاولى فى اول الفصل بان لو كان للالوان
لسان كانت متأخرتش للحظة فى انها تشتبنا

الفراشات

معرفش انا بكتب هنا عن فراشات ولا عن بنى آدمين .. جايز سبب اللخبطة
لأنى شوفت فراشات بنى ادمين وجايز لان فى بنى ادمين استحالة ييقوا فراشات
معرفش...
لما تشوف جمال الدنيا على جناح فراشة ... لما تشوف حريتك على جناح فراشة
.. لما ترسم ضحكك على جناح فراشة ... تقدر ساعتها تفهم ليه ربنا خلق
مخلوق بسيط زيها
الفراشات ماتعرفش تميز ألوانها ولا تتخيل اداية هى جميلة وساحرة زى منتا
بتشوفها فى منتهى الروعة .. لكن هى حاسها بنفسها .. حاسة بسحرها ...
بتمايل فى الحياة بمنتهى الثقة .. بتستمتع بكل لحظة فى حريتها بعد ما كانت مجرد
سجينة شرنقة ... بتستمتع بقدرتها على النجاح والخروج من اصعب مراحل حياتها
... فرحانة بانتصارها على الماضى
يحكى ان ...
مكنتش مستعجلة الفرج وكانت صبورة ... مقيدة فى شرنقة ومحبوسة فى ضلمة ...
شبهنا ساعات .. احنا نفسنا بنمر بدة فى مرحلة ما فى حياتنا لكن ... لكن
بنياس وبنستعجل وبنأخذ اى قرارات لانقاذ حياتنا قبل اهم قرار وهو الاتكال
على ربنا قبل الاتكال على عضلاتنا .. مش مستوعبين الحكمة فى توقيت ربنا ...
للاسف ساعتنا مش مضبوطة على ساعة ربنا ودى اكبر مشاكلنا ...

وهو شافها .. بتصرع الشرنقة من اجل خلاصها ... فحاول يساعد الفراشة في الخروج من شرنتها .. حسها ضعيفة ومحتاجة لمساعدة .. تدخل بعضلاته في انقاذها . مكشش يعرف ان الصراع دة لمصلحتها ... ساعدها بفتحة مقص بسيطة بانه يخرج الفراشة قبل اوانها من ضيقها .. النتيجة كانت مش زى ما كان متوقع ... لان بقاء الفراشة في الشرنقة لآخر فترة ممكنة مطلوب لنضجها .. لكن للاسف ... خرجت الفراشة مشوهة ... ملهاش جناح جميل قوى يساعد جسمها المشوه انه يطير .. حكم عليها بساذجة بالحياة الصغيرة .. مقدرتش الفراشة تنجح في الطيران ابدا

لكن الفراشات مش ساذجة زى اخينا دة .. فاهمة حكمة وتوقيت ربنا .. عارفة اوانها وعارفة ان نتيجة الصراع في مصلحتها في النهاية بس لما ربنا يريد ... لان الصراع دة بيقوى جناحها .. بيخليها اقوى واروع ... بس اوعى تفكر ان الموضوع بسيط

احساس الفراشات داخل الشرنقة من اصعب الاحاسيس اللى ممكن تتوصف ... جربت تموت؟! .. جربت تحس ان كل الظروف بتطاردك وتصارحك زى مادة لزجة محوطاك في كل ناحية منك؟! ... جربت تكون مدفون في الضلعة؟! .. جربت تشوف حلمك بعيدا عنك وساكن في حنة اسمها المستحيل؟! ... اكيد جربت .. الفراشات زيك تمام .. جربت الفراشات احساس الضغط للتغيير المطلوب منها للحياة والنجاة .. جربت الفراشات احساس العجز والذل في داخل مادة لزجة يقولوا ليها نصيب وقدر محكوم عليها من ربنا عشان تبقى احسن ...

جريت الفراشات تشوف حلم الطيران بعيد عنها وصعب المنال لانها حاليا محبوسة
في سجنها ...

لكن الحقيقة

الحقيقة كان عندها الايمان والامل ... الحقيقة انها مستسلمتش ... الحقيقة ان
الفراشة قدرت تعيش بعد الموت ... قدرت تشوف في اخر الضلعة نور ... قدرت
تشوف في المستحيل الممكن .. قدرت تصارع خوفها وأسها وتتصر .. قدرت
تتغلب على كل الظروف عشان خلاصها ... قدرت تصدق بكرة
كنت على وشك الاقتناع بان الفراشات مافيش منهم بشر ... لكن اكتشفت في
ناس عندهم سحر الفراشة وهما السبب في كتابتي الفصل دة .. في ناس في
ضحكتهم امل ... في عيونهم جناحين الفراشة اللي بتأخذني لجمال الدنيا ..
بيتمايلوا في الحياة بمنتهى الثقة .. حياتهم حالة فرح واستمتاع بالحرية والانطلاق
... مافيش في بالهم غير انهم يطيروا وبس ... مافيش ماضى يطاردهم غير بحكمته
... ومافيش حاضر مانعهم عن ضحكهم ... مافيش الا بكرة اللي شاغلهم
باستمتاع ... عندهم في بكرة حلم .. حلمهم " بكرة هنطير اعلى "

البحر

البحر..

الكائن الحى اللى للأسف مهضوم حقه فى التعامل معاه لغويا بانه جماد
سر البحر وسحره مش سهل استيعابه بالعقل .. اظن ربنا خلقنا وفى اعماق
اعماقنا انجذاب داخلى ناحية البحر .. عشان كدة كلنا بنحب البحر .. اللى
مش بيعجب البحر أكيد مش بنى ادم عادى لان حتى اقسى المجرمين قدام سحر
البحر يبضعف

البحر هو اجمل صاحب بعيد عن البشر

فى لحظات مليانة كبرياء وكرامة وجواها مناخير شموخ وعظمة وثقة من الموج تحس
ان شموخ البحر ينتقل لينا احساس القوة .. والقدرة على نحت الصخور اللى
يتوهموا بانها بتصدده ... لكن مع الوقت هو اللى ينتصر عليها .. تحس ان البحر
ينتقل لينا قدرته على السيطرة والتحكم فى كل الغرقانين حبا فيه وهربانين من
ضلمة حياتهم ... كل دة بتحسه فى اللحظات البسيطة اللى يستعرض فيها
البحر عضلاته ... بس مش هدفها انه يخوفنا لكن هدفها انه يحسننا بقدرته على
مساعدتنا والدليل فى دة ... اللحظات اللى ورا لحظات الكبرياء ...

لحظات مليانة حنية وطبقة .. لحظات لما البحر يستسلم لهمومك ومشاكلك
وظروفك .. لحظات لما البحر يسرق زعلك ويتراجع بموجه بعيد عنك ... ياخذ
كل مشاعر حزنك ومواقف ضعفك شوية بشوية ويدى لروحك وعقلك وقلبك

احساس النسيان .. كأن البحر مخلوق بمهمة وهى انه يشيل الضلمة اللى فى حياتنا ويرميها جواه .. فى قلب البحر اللى مليون دموع اصحابه من البشر البحر كريم فى معاملاته .. مشوفتوش رفض مقابلة حد احتاج له .. مشوفتوش طنش حد حب يحكى معاه .. مستعد ومجهز فى كل وقت لانه يسمعك ... جاهز لمشاعرك واحساسيك مهما كانت حجمها .. مستعد يستوعب اسرارك .. اعتقد ان البحر هو اجمل علاقة صداقة ممكن تمارسها بسهولة بدون مشاكل وبدون زيف او خداع

البحر يحب القمر ... يعيش البحر دخول الليل عشان هيعلن عن المقابلة ما بينه وبين حبيبته .. اسأل اى بحار عن البحر وهيدلك على الرومانسية فى علاقتهم .. مافيش حد بيأثر فى البحر زى القمر ... ومافيش شكل احلى للقمر غير وهو غرقان فى حضن البحر.. عشان كدة مش غريب ان اغلب اسرارنا الرومانسية بنحكيها له بمجرد نظرة عيون مش اكثر .. مش بنحتاج لكلام معاه عشان نعبر بيه عن احساسنا ومشاعرنا .. لان البحر فاهمنا .. لان البحر زينا .. يحب .. عارف يعنى اية حب واحساسه

صدقنى لما اقولك ان البحر اجمل حلم صاحى ممكن تعيشه وبمنتهى البساطة ... روح للشط واقف قصاده .. ابعد عن الناس للحظة ودور على اقرب نقطة متسمعش فيها غير صوته ... اتأكد ان مافيش غير صوت الموج جواك ... جهز روحك وقلبك وفكرك للمقابلة ... دلوقتي افتح قلبك وادى المايك لروحك وغمض عينك ... انطلق فى رحلتك

"كن مجنوناً ... ترى الوجود جنوناً"

تحذير : هذا الفصل من الكتاب قد يكون فى منتهى العبقرية وقد يكون فى منتهى الهبل!!

عزيزى القارئ انا خائف عليك منى لان الفصل دة عجيب شوية فى فكرته ... انا
بقدم لىك دعوة صريحة للجنون ...

حفلة افكار من اخراج خيال مجنون .. بيقدمها فى رأى افضل ممثلين جماد ... مع
موسيقى راب باعلى دوشة ممكنة فى فص الدماغ ... الدعوة مفتوحة طبعاً بس كل
اللى حابب يتجنن للحظات ميفوتش الدعوة فى رأى .. جازيز يحب الموضوع
والجنون يستمر معاه .. وغازيز الموضوع ميعجبوش ويفضل بعقله .. فى الحالتين انا
مقتنع بان الهدف من كتابتى للفصل دة هيوصله ...

" كن مجنون ترى الوجود جنوناً "

اضرب صحوية مع الشمس .. واتمشى مع شعاعها على الكورنيش .. عاكسها
وقولها احلى كلام غزل .. قولها عن طموحك واقنعها بىك كافضل شريك حياة
... هتضحك الشمس من قلبها لىك وتدى لجواك دفا محستوش قبل كدة والوعد
يطلع قبل الغروب منها بىكره احلى

قول للقمر اجد نكتة اتنا عارفها .. فى بداية الليل .. يضحك هو عليها لحد
الفجر .. واسهرها سوا .. ضحك وقصص وحكاوى وكأنك قاعد احلى قعدة

مزاج مع صاحبك على اى قهوة .. قصاد السهرة معاه هتلاقى امان وحماية وستر
وكمآن سكك جديدة مفتوحة

جمع سجايك الفرط اللى فى ادراجك والورق اللى ملوش لزمة ومنسى فى جيوبك
.. حطهم قدامك وكلهم عن اهمال الناس وعن نسيانهم ليك .. هيفهموك اكتر
و هيسمعوك من غير مقاطعة

بالمرة واننا فى جيوبك لو لقيت منديل مستعمل اوعى ترميه ... هات منديل تانى
لسه جديد .. حط الاتنين قدامك و قصاد بعض خلى العيون تتقابل ... هتلاقى
الجديد خاف والقلم بكى .. ويقولوا كلام مخصوص عشانك .. ارجوك انسى
الجروح متحطهاش قدامك عشان حلمك ميقلقش

استغل حيطانك اللى محوطاك فى كل ركن من اوضتك واننا قافل على نفسك
وحيد .. وارسم على الحيطان خيال احلام عاوزها وهتموت عليها .. هتلاقى فى
الحيطان شبايك و عيون امل والاوضة وسعت ومبقتش لوحذك

ألمس ورده عيونها مفتوحة لمقابلتك .. وحسها بمنتهى الصدق ... ومتقولهاش ولا
جملة غير " انا محتاجك اوى " ... غمض عينيك واننا لسه ايديك فى ايدها
واوعاك تفكر فى اى حاجة غير انك تحس لمستها ... هتلاقى نفسك مرمى فى
حضن عيونها .. ولمستها تبقى فى لحظة مرهم لتكشيرتك

فى قلب الشتا .. مع رعشة برد مجمدة امل .. اقف فى نص الشارع ومتستخبهاش
من المطر ... دلوقتى خليه يجرى فى ارض مشاعرك بمنتهى الحرية .. واملا قلبك
بالشتا .. هتلاقى ضحكة طفل شقى واحذك ل بكره عافية وغصب عن خوف
حضرتك وجمود بردك اختفى

فى يوم صبح ملان غيوم اطلع من بلكوتتك وخذ قرار ونفذه .. هعمل النهاردة " دماغ سحاب " .. اولاً بتفرد ذراعك وتطير لفوق ... توصل لاعلى كمان .. ايوه تمام ... لحد السحاب .. بمتهى الشموخ ترفع مناخيرك .. تشد اجمد نفس عندك من السحاب .. تبص دلوقت للارض وانتا فوق .. هتشوف الدنيا اوضح وفى مفهوم جديد اتسرب جواك .. الدنيا كبيرة والحلم عايش وسحره حاضر مهما كانت الغيوم ... سحر السحاب يشقلب كيائك مع كل خبطة يأس و يطلعك من غيومك والصبح يبقى بالسحاب عنوان تفاؤل

راقب نمل احتل ركن فى قلب بيتك .. متعرفش امنا وازاى قدر يقتحم بدون ما يقول لحضرتك .. وافتكرا احساس احتل ركن فى قلب حضرتك .. متعرفش امنا وازاى قدر يقتحم حضرتك وكنت مستغرب ... واضحك اوى لانك فهمت قرب ودنك من دقة ساعة متعلقة على الحيطه هتلاقى صوت عقرب مزعج مع كل ثانية بيعاند فيك .. اشخط فيه واغضب بكل قوتك واشتم زى متنا عاوز فيه وصرخ باعلى صوتك ... مافيش رد فعل منه غير انه مكمل وغير انه ييمشى فى طريقه ومعاند فيك ... ابعد ودنك واسمع نفسك .. هتلاقى صوت جواك بيقولك الحياة فرصة مضيعهاش فى الغضب

مع نهاية الحفلة ومع التجربة اتمنى لك جنون سعيد وبالتوفيق

النسخ القديمة

عرفت أنا ليه دلوقت لسه بحب الأفلام العربى القديمة اللى دايما بتنتهى بجواز البطل من البطلة ... انا وحشتنى النسخ القديمة اوى

حاليا انا فى مدرسة الفرير... طبعا انا كبرت ومش رايح ادرس واعيدها من الاول لكن دى لجنتى... النهاردة انتخابات الاعادة او بمعنى اصدق تانى يوم فى انتخابات الاعادة لرئاسة الجمهورية... وانا بحب اروح تانى يوم عشان يبقى فاضى اكتر " ودة تقريبا تفكير الاغلبية برضة فبالتالى بيبقى زحمة برضة "

انا بقى لجنتى فى " مدرسة الفرير " مدرستى فى ابتدائى واعدادى... فيها ذكريات حلوة مقدرش انسائها... كنت اتمنى انى اكون خدت قرار كتابة اليوميات دة من ايامها... كل تفصيلة صغيرة عن المدرسة واحداث يومى فيها نفسى افكرها لكن فى حاجات برضة متتنسش... زى اول قصة حب كانت فى المدرسة دى

تعتبر اول قصة حب صامته فى التاريخ تقريبا بدايتها ونهايتها صمت لانها كانت قصة حب مبنية على النظرات العميقة والايحاءات الابتسامية المتبادلة بين طرفين ... اة فعلا كلام كبير قوى وانا كنت فى خامسة ابتدائى مش فاهمه اصلا لما حبتها .. بس انا اوقات بقول لنفسى انى مش هعرف احب تانى بالشكل دة

فاكر اول مرة شوفتها يومها كمان حصل صوباعى على اسعد صوباع فى العالم

كانت اجمل بنت فى العالم ... على الاقل فى نظرى انا دخلت حياتى من
بداية سنة خامسة ابتدائى لما كنت باخد درس خصوصى ... كان مدرس " بتاع
كله " كان يدينى عربى وانجليزى ودراسات وعلوم "كان قرب يدينى دين
مسيحى" بالرغم انه مسلم ... وبرغم انه شاطر جدا لكن يرجع ليه الفضل فى
فشلى على مستوى النطق فى الانجليزى لسنين كثير لانه كان ولا " اسماعيل ياسين
فى الانجليزى .. وكان صاحب اغنية شهيرة لما يحى يسمع فى الحصة ويردها "
مشربش الشاى..اشرب كازوزة انا " .. الله يرحمه كان صوته بشع
نرجع لاجمل بنت ولاول مرة اشوفها

المكان : بيت فى السبع بنات كانت بنت صاحبة البيت زميلة لينا وعندها اخدنا
الدرس

التوقيت : مش للدرجتى هفتكر

تفاصيل اكثر عن المشهد : فاكرا الارضية الخشب اللى كنت بخجل ببص فيها
لوجودى مع بنت صاحبة البيت لوحدنا مستنين استاذ يحى وانا كنت من النوع
الخجول....ركز فى " كنت "....والمكان كان يادوبك عبارة عن تربيعة خشب
وكراسى خشب وشباك خشب...يوم كله خشب فى خشب... لكن جهود اليوم
اتحرك مع دخولها

تطور المشهد : اقدام تتحرك لصندل يحرك عيني من الارضية الخشب لاجمل فراشة
على رجلين بتتحرك...بمجرد ما نظرى جة عليها.....قلبي نبضه زاد...فاكر
احساسى...جايز تكون درجة حرارتى علت لحظتها...كانت لحظة كأنها دهر لما
عيني جت فى عينها....فستاها البرتقاني جايز يكون السبب فى ارتفاع درجة

الحرارة أكثر كونه زى شعاع الشمس اللى نور اوضة الدرس بس كل تركيز الشعاع كان عليا انا... نسيت كل الكلام اللى اتعلمته مع انى كنت الاول على المدرسة فى تالته ابتدائى... ومع انها قالت "مساء الخير" لكن فقدت النطق وابتسمت ورجعت تانى للنظرة للارض الخشب... اظن ان كانت أكثر امينياتى بعد نهاية الحصه الاقنى صندلها واقع على الارضيه الخشب واروح ارجعلها الصندل... بعيدا عن المبالغه بس هى فعلا كانت سندريلا.... كنت مستنى من بعد ما بدأت الحصه اى فرصه لسؤال واعمل فيها سرحان فى الاجابة عشان اخطف نظره ليها... اظن وانا فى خمسه ابتدائى كان عندى رومانسيه نزار قباني مع انى طبعاً مكتتش قريتله فى السن ده

اما اول لمسه كانت اثناء الحصه ومع وجود كلمه غريبه فى النص اللى كان بيقراه استاذ يحبى من كتاب العربى... شاورت انا وهى على نفس الكلمه... قدر الصواب وتلاقى افكار سمح بخلق لمسه... لمسه خلعت كل جسمى يتحول لسبابه.... كان صوباعى ده اسعد صوباع فى العالم باللمسه فى اعدادى كانت معايا فى نفس الفصل فى الفرير... ولمده تلت سنين حصلت كل الاحداث الصامته الممكنة بين طرفين فى الاعجاب .. من ابتسامات سحرية لاحاديث عيونيه... كنت بارد على مستوى الفعل " بطبعى كنت خجول " وهى كانت تتلذذ فى استفزازى وتميل للاستهبال احيانا ... مشكله الحب الصامت انك ساعات متبقاش عجبك تصرفاتها ولانك ملكش كلمه عليها مش قادر تنطق ... وتبقى هى غيرانه عليك جدا بس مش عارفة تنكد عليك .. مشكلتنا ان كل

واحد بدأ يستخدم عيوب الحب الصامت تحدى قصاصه الثاني .. وكانت " الفسحة
" هي الوسيلة لممارسة هذا الجزء الخبيث من الحب

لكن يفضل الاجمل هي المشاعر و الذكريات اللى فضلت محفورة فى قلبي
والاحساس نفسه بالحب كان احساس جميل كأن جواك رغبة بتجذبك لعالم مليان
بالالوان والدفا والضحك من القلب .. احساس جميل انك تحب واحساس اجمل
انك تتحب .. احساس جميل انك تقول للاوكسجين اركن على جنب وانك
تعيش على حبيبك كمصدر للحياة .. انك تعتمد تروح كل دروسك فى اتجاه
بيتها عشان تلمحها وعلى اللحظة الواحدة جمال يومك كله ينحصر فيها ... انك
تسمع اسمك يتردد جنب اسمها فى الاشاعات الخبيثة اللى بتتطلع ما بين الشلل
النمامة فى الفصل .. اظن ملامحها كانت اهم مذاكرة ليا وكنت مدمن دراسة
عليها سواء فى عالم الواقع او حتى فى عالم الخيال ..

كل دة افكرته وانا واقف قدام التلت فصول بتوع اعدادى قبل ما ادخل لجنة
الانتخابات .. كل دة افكرته وانا قلبي فرحان بطفولتى اللى كانت مليانة
رومانسية وبراءة ... مش عارف قدام الفصول كنت مشتاق لاول قصة احب اكرر
ولا لطفولتى اكرر ... بس كل اللى اعرفه انى مفتقد النوع دة من النسخ القديمة فى
الاحاسيس والمشاعر والنسخ القديمة من الاشخاص والنسخ القديمة من رومانسيتى

قطر الحب

كل قطارات الدنيا ممكن تمشى من غيرنا ماعدا قطر الموت ... يعنى ببساطة
بايدنا نختار محطات كثير ننزلها زى محطة الحلم ونعيش فى مدينة الاحلام ..
وساعات بدون ارادتنا الحياة تجبرنا على أننا نزل محطة مش على كيفنا زى محطة
الجرح ونعيش فى عالم الوجع ... لكن تفضل محطة الحب هى اللغز ..
اغلب حياتنا بنعيشها فى شباك التذاكر الخاص بقطر الحب .. عاوزين نشترى
ومش عاوزين ... وتقف الحياة على مشهد الانتظار واحنا ماسكين مشاعرنا
بايدنا ونفكر .. ندفع التذاكر ولا مندفعش !!؟ ...
ساعات متفهمش هو بايخ !!؟ ولا عنده حق !!؟ ... اقصد البيه اللى يقطع
لنا التذاكر لما يخطف المشاعر مننا .. اقصد " الطرف الثانى " اللى اتسبب فى
المعضلة .. بس برضة تفضل الصعوبة مستمرة لان حتى لو دفعنا ثمن التذاكر
غصب عننا .. ولو حتى ركبنا القطر غصب عننا ... ممكن ننط من الشباك
ومنكملش السكة لغاية الآخر ... خالة كدة !!
اعرفك اكثر على البيه اللى يقطع التذاكر ..
بدون مبرر لما تشوفها تضحك .. سواء مصدر الرؤية كان واقع ملموس ولا طيفها
فى خيالك .. مش مهم السبب اوى بقدر اهمية النتيجة وهى انك لما تشوفها
تضحك ... تفاصيل صغيرة بتفرق فى وجودها .. هتفهم لما يبقى قلبك حارس
مرمى خايب وكل ضحكة منها جون ... وتفاصيل اكبر بتظهر فى غيابها ..
هتفهم لما حتى فى الغياب حقوق " انشغال البال محفوفة " ... سحر امبارح

بمحضورها... وبكره مش جاي الا بمحضورها .. وما بين امبارح وبين بكره ليالى كثير
فى العمر مش محسوبة الا فى اوقات مرور طيفها فى خيالك .. بتعامل معاها كأثما
تخصك لوحذك ..

بدون مبرر لما تشوفيه تهرى .. جزء منك بكبرياء يهرب منه لكن الجزء الاكبر
منك يهرب ليه .. قادرة تقومى بكل الادوار عشان تبانى قوية وثابتة ومتحكمة
بس عارفة من جواكى ان الدور اللى بتحلمى بيه انك تكونى البطلة فى قلبه ..بقى
شئ اساسى فى حياتك زى الهوا انه يجى على بالك ... الحرب العالمية الثالثة
بتدور فى قلبك لما تشوفيه مع غيرك ... فجأة بقيتى انانية لان الزائر الاعظم مع
دخول الحب فى قلب المرأة هو الغيرة .. عارفة ان سحرك فى انك تكونى على
طبيعتك وبساطتك فى التعامل بس انتى عاوزة تبقى فوق طبيعتك قدامه عشان
تسحريه أكثر ..

البية اللى يقطع التذاكر هو اجمل شخص هنصادفه فى حياتنا ... قادر انه يغير
كل حاجة فينا لو قررنا فى نهاية المطاف اتنا نركب قطر الحب ونكمل السكة
للاخر ... شخص قادر على احتلال الحواس .. شخص قادر على تشكيل عالمنا
بطريقة ساحرة ومختلفة ... شخص مش هتنساه حتى لو فى النهاية برضة مركبناش
القطر .. عشان الاحساس اللى هنعسه صعب يتنسى ..

عارف اتنا احساس المجهول اللى احنا بندور عليه عشان نحس بطعم الدنيا؟! ...
عارف اتنا احساس اللون اللى ييشدنا لكون مليون ضحك من النوع الجدد اللى من
القلب؟! .. عارف اتنا احساس الاختيار اللى مره حلاوة بانك تفضل انك
تموت غرقان على انك تعيش على شط امان؟!؟! ... عارف اتنا الاحساس

الصعب بان المنهج اللي احنا لما نذاكره طول السنة عشان وقت الامتحان وتقوم
تجى الاسئلة من برة المنهج بس بتلاقى الاجابات طالعة بصدق اكبر واننا مش
عارف ولا فاهم ازاي ... الاحاسيس دى كلها " حب "

بس احنا مصرين على التعامل معاها بدون عفوية .. لكن المشاعر اقوى و بتخرج
بتسريبات اضطرارية من ملامحك مهما حاولت انك تجيد فن الكتمان ... جايز
عندك قدرة على التحكم فى عدم التعبير بالكلام لكن العيون اقوى ... جايز
عندك القدرة على منع تصرفات جنونية فجائية من جسدك لكن متقدرش تمنع
روحك من الرقصة الحميمة مع مشاعرك .. الروح افضح من الجسد

مشكلتنا بقى اننا مش مقتنعين بالحقيقة دى ... مع ان المشاعر اكبر دليل على
انك حى ساعات للأسف بنبقى متمسكين بالحياة لدرجة اننا منعيشهاش
... الخوف والتردد كائنات لزجة زى حزام الأمان على القلب بمبرر الحماية من
حوادث النبضات لكن الحقيقة انها قيود على اننا نعيش .. ازاي بنرفض نعيش فى
الارض ونرضى بغربة التوايت !! .. منكرش ان اكثر حاجة بتحسنا اننا كبار
هى جروحنا .. ولاننا كبار بنستخدم عقولنا اكثر ... لكن هل عقولنا ضد ان
قلوبنا تعيش !!؟؟ .. احنا للأسف بنعتمد كثير كمصدر للسعادة فى مطعم الحياة
على البقشيش .. مش غاويين نعاقر وخصوصا فى حوار المشاعر .. مع ان جزء
من جمال الحب فى عذابه ...

مافيش داعى لاننا نتظاهر بالقوة لاننا جوانا قلب محتاج انه يدفا وروح محتاجة انها
تشبع والحب يقدر يغيرنا للافضل ويقدر يخلينا نلمس السما ونمسك النجوم فى
ايدنا ونعيش حياتنا بشكل مختلف .. ما بين كل الروايات فى حياتك هتفضل

الرواية المفضلة هي رواية حبك .. قطر الحب مستنى قرارك متأخرش ... طوبى
لاصحاب القلوب الدافية
..

في الحب لا تصمد

" لأ .. عشان دماغك جذمة "

رد رائع بسمعه كل يوم لما ابص في المرايا واسألني في المرايا وانا بغمزلى بعين واحدة
" مش هنفرح بيك بقى وتحب؟؟ ... ومع انى متأكد جدا ان المرايا جابت الكلام
دة من عندها واني منطقتش باللى بتقوله دة بس الحقيقة انا بقيت مقتنع بان في
حالة في حياتنا ملائمة لكوبلية اغنية لهشام عباس " وانا تبقى السكة السهلة
قصادى واروح للسكة الاصعب "

في فئة من المجتمع اصحاب حكم رائعة مينفعش ابدا اننا مناخدش بيها " بستهيل
" .. السواقين " بستهيل " .. ودة يرجع لانهم اتعاملوا مع كل اصناف المجتمع
بداية من البلطجى لحد البشمنهندس وفي تعاملاتهم معندهمش فتنة طائفية او
عنصرية فكرية تحزبية " بستهيل " ولو افترضنا ان دة حصل فدة ميمنعش ان
الجميع احرار في السب والقذف داخل مركوبته " بستهيل " .. المهم ان سواق
الميكروباص قالى حكمة ساعدتني انى ارد على المرايا " بستهيل " " يا بيه انتا
عارف سبب كل المصايب و الامراض اللى في البلداية ____ الستات "
طبعا انا لقيتها مبرر للكائن اللى في المرايا المصر على ممارسة الحب بانى عاوز
افضل سليم ومتجيش ليا مصيبة ولا مرض ... وطبعا دة مبرر هدفه انى استهيل
من السهل جدا اننا نحب .. بس احنا بنبقى عاوزين حاجة معينة .. الحاجة اللى
بتحرك الكائن الثقيل اللى قاعد وحاطط رجل على رجل في الجنب الشمال ... و

لان احنا مصريين على الحاجة اللي بتحرك الكائن دة فاحنا من كتر الانتظار ممكن نمل ويمكن لما يجي الحلم مناسب وعلى مقاس الكائن الثقيل اللي فى الشمال يكون فرحة الحلم نفسه قلت ومبقتش زى الاول

فى نوعية من البنى ادمين .. وانا منهم ... بيقولوا احنا مش بنفكر فى الحب لكن الحب هو اللي ييفكر فينا .. بس احنا بنرفض .. عبارة عن نسخ من الحكمة متحركة على قدمين بينصحوا كل اللي حوالينهم فى قصص الحب لكن هما نفسهم ملهمش فى الحب ... بس الحقيقة ان الحب ملوش مواعيد والقلب ملوش ترباس تقفل بيه على مشاعرك واحاسيسك .. الحقيقة اننا كتير جدا بنقابل شريك الحياة المناسب لكن بنعانده فى نفسنا فى سبيل راحة الكائن الشمالى ...

الحب دة اكبر فرصة فى انك تقابل الوجهة التاني الممتع من حياتك ومن احلامك ... فى عالم رائع من الالوان والسحر انتا لسه مدخلتش فيه ... مستنيك لو لسه محبتش او بتحس بس بتمنع نفسك من الاعتراف .. الحب هو ملايين من الحاجات الصغيرة الجميلة والبسيطة اللي بتفرق .. هو عالم بدون سكان لكن زحمة وابدا متحسش بالوحدة لان حبيبك بيسكن فيه .. وعشان كدة يستعجب من اننا نخضع الحب لقانون ولمسبات وفى الحقيقة مافيش قانون فى الحب .. مافيش سبب فى الحب

تعالوا احكى ليكم على شوية تسريبات من مشاعر اللي حواليا ... هى مشكلتها بانها عاوزه تختار بطريقة فريدة وعجيبة ... كأنها بتختار بلاط بيتها بفكرة بلاطة من ايطاليا على بلاطة من تركيا جنب بلاطة من كوريا ... تفاصيل تفاصيل شريك حياتها هى شغلها الشاغل وعشان كدة رفضت كل الفرسان اللي

حبوها ولو حتى كان الفارس رائع جدا كنت بتطلع عيوب في حصانه ... عشان
هى مستنية الكمال للأسف مش هتعرف تحب
هو حاسس انه يستحق اجمل امراة فى العالم .. عاوزها تكون " بتاعة ربنا " وهو
نفسه مش يوصلى ... عاوزة تكون " جميلة جدا " مع ان الصح انك لا تختار
امراة صاحبة جمال يغلبه الزمن لكن اختار امراة يعجز الزمن عن انه ينال من جمالها
... نفسه تكون من " مستوى اجتماعى ومادى على " مع ان المعيار الحقيقى فى
مستوى البنى ادم اخلاقه .. عشان هو مستنى الكمال للأسف مش هيعرف يحب
هى من اصحاب فئة الصمود وبتقول على نفسها مليش فى الحب .. على الاقل
مش دلوقت .. جايز تكون خايقة بس دة مش مرر كفاية لان الحياة جمالها فى
مغامراتها .. جايز تكون واثقة من قدوم الحب المدبر من الله وانه لسه مجاش اوانه
بس احنا اوقات كثير بنغلط و ساعة رغباتنا بتكون مش مضبوطة على توقيت ربنا
.. منين تعرف و الحب فرصة !! .. بتقول انها مرتاحة مع هدوء الحياة فى مدينة
الكائن الشمالى لكن مش كل الهدوء متعة .. جايز تفوت فرصة تبدل حالتها
وحالة الكائن الشمالى لاسعد اتنين على الارض ... والفرصة بنت جميلة راكبة
عجل بيدال شعرها يبطير قدامها بيدارى عليها جمالها والعامل لو يلحقها يتبدل بيه
الحال " اغنية لمنير "

هو عاوز يعرف واحدة ميكونش ليها تجارب " مع انه مقضيها " ... وهى عاوزة
واحد يحبها اكر من حبيبها الاولانى اللى سابها " مع ان لو فضلت تعيش
باحساس امبارح عمرها ما هتتحس بيكره " .. هو عاوزها تكون شبهه " ومافيش
نسخ متكررة فى الكون والتشابه بيولد الملل " .. وهى عاوزاه يكون من كوكب

تاني " لسه جدل العلماء مستمر بخصوص وجود حياة على كواكب ومجرات ثانية
او لأ ممكن تستنى !! " ...

الحب هو عالم الاسئلة اللي ملوش اجابات .. متعاملش مع الحب ب " ليه " و
" امنا " و " ازاي " ... " ليه " معناها الحبك حدود والحب انك تحب للحد اللي
ملوش حدود ... و " امنا " معناها ارادة والحب ثورة لا تعترف بارادة غير ارادتها ..
" ازاي " معناها تخطيط والحب جنون ملوش خطة انتا فقط بتمارس كل التصرفات
الطفولية العفوية الصادقة ..

ولان لكل كلكوعة حل ... اظن حل الفوزرة في الآتى :
احنا بشكل او باخر مش بنوزع مشاعر الحب على اللي عاوزينه لكن بيتزعها مننا
اللى يستحقوها غصب عننا ... اسمح لهم بالتسلل الخفى في اعماقك مدام
صادقين ...

صارج نفسك بحقيقتك ولا داعى للمراوغة ... اللي هتختاره اسمه " شريك حياة "
... ابني حياتك عشان شريكك يلاقى الحياة اللي هتقسموها سوا ..
اتعامل مع اللي حواليك بعدسة كاميرا صافية .. شوف الناس من الزوايا الجميلة
وألقط الصورة باحتراف .. الكمال في اوقات كثير بيرجع لطريقة نظرنا ... من
الاخر الشخص الكامل اللي بتدور عليه مش هيكتمل الا بيك
اتعامل مع الحب على انه اختراع مخصوص عشانك .. عشانك انتا ... عشان
شريك حياتك يحبك وانتا تحبه لازم تحس بالملكية للاختراع ..
اتعامل مع الحب كوسيلة مش كههدف للسعادة ... كتر التفكير بيولد خوف وقلة
التفكير بيضيع فرص .. الحياة مش هي الحب لكن الحب نوع من انواع الحياة

الحلوة اللى انتا لسه مجربتهاش مش أكثر .. المقصود انك تحتفظ بطبيعتك لان
الاختيار الصحيح سره فى البساطة ..
لما تحب خليها " روما " وكل الطرق تؤدى ليها ... غير لها شكل الكرة الارضية
على حروف اسمها ... لما تحبى مافيش داعى لانك تكونى ضمير غايب فى يومه
بقصد التقل او الاستهبال ... خليه يحس بالدفا بصدق اهتمامك
فى النهاية احب احسم جدال اصحاب المقامات العالية فى الصمود بان الاشياء
الجميلة تستحق فعلا الصبر ... ولكن الفرص الرائعة تستحق الرغبة والانتزاع

المسئولية

في مركز الذكريات في حياة انا عشتها وفتقدتها جدا ..
أيام لما كنت طفل .. أيام عشتها كانت في منتهى البساطة والحرية .. كنت
بصحي الصبح عشان طموحي ان بكره مليون بلعب أكثر عن النهاردة ... كان
في لحظة عشان اليوم بيخلص بزعل و ييوحشني إحساس الإندماج مع خيالي اللي
كنت عليه من اول ما اليوم يبدأ ... كلنا كنا كدة ... وعشان كدة كنا بنام
بالعافية وبالخناق بس لما نغمض عينينا كنا بنام على طول .. عارفين ليه ؟؟ ...
عشان بكره في خيالنا احلى
كانوا يياكلونا ويثربونا ... مكش مطلوب مننا اننا نعمل اى حاجة فيها
مسئولية .. مكش مطلوب مننا اننا نغامر أكثر من تحملنا عشان نقدر نعيش ...
كانت الحياة بسيطة واغلب التفاصيل اللي فيها سهلة ومش محتاجة مجهود يذكر
عشان نمارسها ... كان اكبر مسؤولية هي عمل الواجب والمذاكرة ... وحتى دول
كان في مساعدة سواء من البيت او المدرسين الخصوصيين .. كانت اقصى
الضغوط بتبقى اننا نلحق طابور المدرسة قبل ما يبدأ ونتعاقب او دخول امتحانات
نص السنة واخر السنة ... وللبعض اخر حاجتين دول مكش ضغوط كمان ..
كل لما اشوف لبسي وانا صغير بستغرب اوى .. انا كان زوقى كدة !!؟ .. انا
كنت بحب البس تى شيرت عليه كتكوت !!؟ .. انا كنت بلبس جزمة حمرا !!؟!!
.. احساس رائع انك تفتكر اختيارات الست الوالدة للملابس اللي تناسبك ..
الشخص اللي اتا كنت عليه كان غير مهتم اطلاقا باى الوان او اى استيلات في

الليس لان كان في ناس مهتمة بده وكان في ناس شائفة الذك دايم رافع مهمما
كانت حانة لبسك .. بالعكس لبسك ده كان باب مفتوح للالوان انها تدخلك
وانها تعيش جواك فتحب الحياة أكثر

فاكر لسه المحاولات المستميتة عشان افدر اركب العجلة واسوقها لوحدي ..
والدى حاول كتير الحقيقة معايا عشان انجح في محاولتي ... وبرغم فشلي لكن
والدى مرضاش ابدأ ان المتعة في ركوب العجلة تنتهي ... معاقبنيش على الفشل
بالعكس ساعدني بانه خلى العجلة بتلت عجالات .. عشان تفضل السعادة في
ركوبة العجلة متعة لا تنتهي بالنسبة ليا حتى لو غيرى شاف ده فشل في اني اسوق
العجلة زى باقى الاطفال القروء اللي في سنى ... احنا كتير في تجاربنا بنركز على
النهاية سواء النجاح او الفشل لكن بننسى متعة المحاولة نفسها

وانا صغير كتير كنت بعمل افلام من اخراجي وتألفي التلقائي اللحظي باللعب
والدمى اللي حواليا .. بطلع كل افكارى بمنتهى التلقائية حتى لو كان البعض منها
شقى وخارج عن طبيعتي وحتى لو كان البعض منها جنوني وخارج عن حدودي
كطفل ... كنت ببقى مبسوط من نفسي وانا بكلم نفسي وبطلع الفيلم بالروعة
دى والفيلم بيخلق ابطال يقدروا يبقوا قد المسئولية وكل في الفيلم مبسوطين
بقدرات البطل ... اجمل ما في الموضوع ان المغامرة خطورتها خيالية
دلوقت الفيلم اللي بيعشه مش دايم بيبقى من اخراجي وتألفي ... دلوقتي الفيلم
واقعي والخطر ملموس ...

مش عارف هل دى حاجة وحشة فعلا طول الوقت !!!

شبح المسؤولية اللي يطاردنا في كل زاوية من ضميرنا .. هل هو شبح مرعب لمتعة الحياة؟؟

الطفولة اننا نعيشها في بعض تصرفاتنا واحنا كبار حاجة حلوة بس هل معنى ان تصرفاتنا كبالغين مش ممتعة !!؟؟

عارفين خطورة اننا نصدق طول الوقت ان متعة حياتنا وان اجمل اوقاتنا كانت وقت ما كنا صغيرين بس !!؟؟ ... ساعتها احنا مش هنعرف نخب حياتنا صح ... مش هنعرف نشوف بكره بشكله الحقيقي .. هنكره المسؤولية

لكن المسؤولية مش وحشة كدة ... وفي نفس الوقت ضرورية لحياتنا ... مش عاوز اقولك انها ساعات بتبقى متعة .. لو انتا مستوعب جماها

انتا دلوقتي بتختار طريقك وتختار اهدافك ... دلوقتي بقى ليك كيريما خاصة بيك سواء في لبسك او في مشيتك او في ضحككتك او في اسلوبك كلامك ...

دلوقتي ممكن تبقى مسئول عن حد بتحبه وتقدر تقدمله حاجات ولو بسيطة تضحكه من جواة ... احساس انك مسئول عن سعادة حد وتحققها كأنك على الارض قدرت تلمس السما ... دلوقتي انتا ممكن تبقى مسئول عن علاقاتك مع

كل اللي حواليك بداية من ربنا نهاية بزميلك في الشغل بانكم تعرفهم اكثر وتفهمهم اكثر ساعتها هيدخل جواك احساس جميل وانتا صغير مجربتهاش .. منكرش ان في حاجات مختلفة وانتا في المسؤولية وساعات بتبقى صعبة فعلا بس ارجوك حاولت تعافر عشان تستوعب ان كل فترة في عمرك وليها معنى وقيمة وجمال معين خاص بيها

لما بتكبر وعمرك يزيد سنة ورا سنة المسؤولية بتدخل جواك اعمق واعمق ...
وتفضل المسؤولية جزء اصيل منك لا يمكنه الرحيل ببساطة ... مهما اتقدم العمر
وبقيت شيخ كاهل غير قادر على الفعل ... تفضل حتى كلماتك مسؤولية ... لا
يمكن تجنب المسؤولية .. لا يمكن الهروب منها .. لانها ببساطة مهما كانت
صعوبتها هي دليل على انسانيتنا .. دليل على نضوجنا .. دليل على فهمنا لحقيقة
ان المسؤولية هي حريرتك .. هي ادراكك لقيمتك .. هي مجموعة اختياراتك اللي
بتشكلك .. هي ببساطة عدم الاتكالية على الام في اختيار ملابسك اللي
تناسبك او عدم الاتكالية على الاب في قيادتك لعجلتك ... المسؤولية هي معنى
حياتك الحقيقي

العملة النادرة

انا مصحى بكره الصبح عشان عارف انك موجودة
من المميز جدا ان يكون في حياتنا حد مهتم بتفاصيلنا و بملامح روحنا ... حد
عنده حل عجيب في اى مشكلة نقابلها ويطير الحزن من قلوبنا بدون ما ينطق
بكلمة لكن يسمعنا بس وبنرتاح .. مع اننا جايز ماخفناش من المرض لكن
العجيب ان مبقاش في وجع ... الحد دة بنشاركه عالمنا بدون قيود .. حرية في
التعامل .. بنفرح معاه بجد .. وبنزعل معاه بجد .. مافيش رتوش ... مافيش
تجميل ... زى مافيش مكان لظهور تجاعيد في علاقتنا ... علاقة في المطلق ...
مافيهاش غير مساحة راحة جنب مساحة راحة جنب مساحة راحة ومافيش مكان
للخوف .. مافيش مكان للكسر .. مافيش مكان للشر .. مافيش مكان للغدر
... بتنام وانتا واثق جدا ان بكره فيه حد يبجيك اوى ... حد هيتهم بيك لو
بكره مجاش حلو زى منتا متوقع ... وحد هيفرح اوى لو بكره جة وفي ايده حلمك
... حد هيزعل اوى لو انتا مبقتش موجود في بكره ... يقولوا عليه حاليا "
العملة النادرة " وسابقا " الصديق " .. عملة نادرة لان من الصعب انك تلاقى
حد بالمواصفات دى بمنتهى البساطة ... احساس رائع انك تلاقى الحد دة في
حياتك ... لكن ..
في حياتى موجودة ... صديقة من النوع النادر في وجوده ... المجتمع نفسه بيرفض
فكرة وجود صداقة بين الولد والبنت وجايز يكون له اسبابه المنطقية لكن انا

معنديش اى مبرر انى ارفض صداقة من حد. بمواصفات العملة النادرة ... كنت
"سقى بحدون" لو رفضت ... والمجتمع سميره بحدون او رفض ..

انا فاهم نيه بقينا اصحاب بالدرجة دى ... لاننا مجانين رى بعض وجايز لاننا
نادرين زى بعض ... وعشان لو حتى جزء من المجتمع عارض النوعية دى من
الصداقة بحجج مختلفة " زى مينفعش " " ممكن الموضوع يتقنب حب " وكل
الدراما التركية والافلام العربى القديمة المؤثرة فى ثقافة تفكيرنا فى بعض الاوقات
مكتش هعلق ... عشان كان من حسن حظى انما اكبر منى سنا .. جايز دة وفر
كمامة صمت كفاية ليهم ...

وللمعارضين احب اقولهم خليك مكانى ... ازاي ترفض حد يستدرك فى ضعفك
!؟ .. ازاي ترفض حد ييقى ابتسامتك لما تبقى فرحان وتكشيرتك لما تبقى زعلان
؟؟ .. ازاي ترفض حد يكون ضهرك فى المشكلة وكرشك فى حلوها !؟ .. ازاي
ترفض حد يكون معاه منديل لما تبقى مضايق ويكون معاه حشيش لما تبقى
مبسوط !؟ .. ازاي ترفض حد جدع عضلات قلبه كلها اخوة ومحبة ومساندة
عشانك !؟ ... ازاي ترفض حد لما ييشوفك مكشش يقوم يشد ضحكك غضب
عنك وما يسبكش غير لما توصل الضحكة لحد قفاك !؟ ... ازاي ترفض حد
بالشكل دة لمجرد انه من الجنس الاخر .. احنا معندناش فى الصداقة جنسين ..
احنا من جنس واحد من كلمة واحدة اسمه " الاخوات "

يوم ما قررت تهاجر امريكا كان فى جزء منى قرر يهاجر زيها ويروح معاها ... كان
فى جزء مهم فيا قرر يكون مهمته انه ياخذ باله منها لما تكون هناك ... كان فى
جزء منى قرر يروح بكل الذكريات اللى فى القلب قبل الصور وبكل المواقف اللى

فى الروح قبل العقل يسندھا لما تبقى ضعيفة او وحيدة هناك ... جزء عمره ما
هينسى العملة النادرة فى حياته اللى نطلى لحياته راحة وامان ... جزء عمره ما
هينسى الحد اللى خلاله يضحك من قلبه .. جزء برغم المسافات وبرغم كل ال "
جايز " فى نوع المغامرة المفروضة على صداقتنا بيعترف بايمانه بيها وبان الصداقة
قادرة تتغلب على الظروف وعلى البحور وعلى التوقيتات .. فى جزء واثق اوى فىا
من ان العملة النادرة مش هتتغير قيمتها بالدولار وهتفضل العملة نادرة بمحببتها
وبصداقتها وباخوتها ... عشان كدة انا هصحى بكره عشان عارف انها موجودة
كل اللى بطلبه منك فى الفصل دة بانك لما تلاقى عملتك النادرة بالمواصفات دى
اوعاك تفرط فيها وافهم ان صداقتكم مهما حصل ومهما اتقال اقوى من الظروف
والكلام .. جايز العملة تبقى من نوعك وجايز تبقى من النوع الاخر .. مش
مشكلة ... مدام انتا ناضج كفاية انك تفرق وواثق كفاية انك تفصل

ولاد أختي

إحنا لسه لحد دلوقتى بتاخدنا صور العيال لما بنشوفها لعالم من الضحكة جوانا ..
لما بنشوفهم ييلعبوا وتتابع شقاوتهم بنحس بحاجة جوانا بتلمس ذكرياتنا وتحرك
جمودها ... بتتحرك مشاعر من الرغبة الممزوجة بشوق للطفولة .. بنحس اننا
نفسنا نكون تانى اطفال زيهم ... بنحس اننا محتاجين نبقي بنفس حريتهم ...
نفس شقاوتهم .. بتلقائية تفكيرهم .. بفطرة تصرفاتهم .. بس هو اية يمنعنا من
اننا نعمل كدة؟؟ هو اية يمنعنا من اننا نعيلى؟؟

هو اية اللي يخلي السحاب ماسك نفسه كدة وما بيوقعش!!؟ ..
هى العصافير ليه بنحبسها جوة قفص ونضايقها مش هى بتطير فى السما وتبقى
فرحانة!!؟ ...

هو احنا ليه ربنا مخلصناش بتطير؟؟ ...
اسئلة جاستن ابن اختي خلتنى احس اد اية براءة الفكرة ممكن يخرج بحر من التأمل
فى مجرد كلمات بسيطة طالعة من جوة عقله الصغير عشان تطرح اسئلة كبيرة اوى
.. ساعات حتى بنعجز قصادها اننا نقنع .. نقنع بمسلمات احنا نفسنا جايز
منعرفش هو فعلا ليه!!؟ ... جايز اجابات مننا تكفى اوقات لفضولهم لكن لو
اكتفينا بكدة بس .. يبقى فشلنا .. لاننا مدناش فرصة لنفسنا اننا نفكر زيهم ..
نحس زيهم ... يعنى كام مرة بصيت للسما وقولت الاحساس دة!!؟ .. كام مرة
شوفت عصفورة طايرة حسيت بفرحتها!!؟ .. كام مرة شوفت عصفورة فى قفص

وحسيت بكسرتها؟! .. كلنا اتمنينا اننا نظير واحنا صغيرين بس كام واحد عارف
اجابة هو احنا ليه ربنا مخلصناش بنظير؟! ..

كل الاطفال بيبقى ليهم اصحاب خيالين ... جايز يكونوا حاجة ملموسة زى
لعبة مثلا ... وجايز يكون شخص خيالى غير موجود بالمره ... كل الاطفال
بيدندنوا لما ييسرحوا فى لعب او فى قعدة لوحدهم بنغمات تلقائية كأن ارواحهم
بتغنى مع عزف قلوبهم .. كل الاطفال عندهم موسيقى جوة قلوبهم وخيال ضخم
فى عقولهم ... ليه احنا مش عندنا نفس الموسيقى ونفس الخيال؟! ..

كل الاطفال عندهم قدرة كبيرة على النسيان الا فى رغباتهم ... يقدرنا يسامحوا
اى اخطاء الا فى الوعود ... احلامهم ممزوجة فى واقعهم ... مافيش سور
قصادهم ... مافيش اسلاك شايفة تعاكسهم ... مبيقدروش يخبوا الا العفاريات
فيهم يقدرنا يخبوا .. بس لفترة مؤقتة ... والفترة ممزوجة بفضيحة على ملامح
وشهم من ابتسامات شقية على لمعان عيون كدابة بس حلوة ... حلوة انها
بتحكى الحقيقة اللي هتقال مع مرور الوقت لان برائتهم اقوى .. احنا ليه على
عكسهم تماما مبنقدرش ننسى الا رغباتنا؟! .. احنا ليه مبنقدرش نسامح؟! ..
... ليه مبنعرفش نحلم فى واقعنا ونغيره؟! .. ليه احنا عندنا اسوار واسلاك شايفة
بتعاكسنا بالشكل ده؟! .. ليه بنحبي حقيقتنا ونتفتن فى خداعنا لنفسنا قبل
غيرنا؟! ..

عارفين احنا مشكلتنا فى اية؟! عارفين الفرق فى اية؟! ... الزحمة
عندنا ازمة مرور فى حياتنا بسبب الزحمة ... زحمة من الافكار غير معلومة المصدر
و غير صادقة المحتوى ... زحمة من الخطايا الغير مسئولة ... عندنا زحمة من

الاحلام الغير مجدية ... عندنا زحمة من المشاعر الغير حقيقية ... عندنا زحمة في
اهدافنا وفي خططنا وفي طرقنا ... عندنا زحمة في قلوبنا واوراحنا وعقولنا ... زحمة
غير مبررة .. زحمة بنكبرها يوم وراء يوم في حياتنا .. زحمة خلطنا ننسى كيان .. زحمة
خلطنا نقتل في اجزاء متنا انسان ... انسان كان اساسه رائع .. اساسه خيال ..
اساسه ضحكة ... اساسه رغبة وحلم ... اساسه براءة فكرة .. اساسه فطرة فعل
.. اساسه طفل في احلى واجمل صورة بس الزحمة غطت ملامح الصورة
ولاد اختي الصغيرين في سنهم ادوني درس كبير في حياتي .. عشان ارجع لازم
احل ازمة المرور وامحي الزحمة

نازعة الصبار

في حالات تصحى من النوم وفي ودانك موسيقى هادية ودة اللى بنوصفه بصاحي ومزاجك رايق .. وفي حالات تصحى على صوت سكون جميل وكأنك لسه مولود طازة ... وفي حالات تصحى في حالة تشابك ما بين الواقع والحلم ومجادلات بسيطة لحد حسم الموضوع لصالح الواقع ... وفي حالة صعبة بانك تصحى وفي دماغك صبار .. صبار قاعد يشوك في افكارك ورافض خروجها ... ويرفض يلم شوكه ويخرج بهدوء منك ... في الحالة دى يفضل في شخص قادر على نزع صبارك ... وجوده حياة في حالة الصبار ... بمجرد ضحكة منه يبقى بطل يومك ومنقذه ..

هى نازعة الصبار الاولى في حياتي ...

وصف البنى ادمين صعب لانهم مش كلام على الورق .. وهى بالذات مينفعش احصرها في شوية سطور ولا تسكن تحت عنوان ... لانها متميزة .. عجزى معاها مماثل لعجز الكاميرا في التعبير عن ملاحظها لان جمالها اكبر من انه تستوعبه صورة لما تضحك ... ونفس العجز في ريشة فنان لو فكر يرسمها لانه معندوش الواحها وبالنسبة ليا شخصيتها اصعب من ان يوصفها قلمي لان القلم محدود بعدد قليل من الحروف وهى محتاجة للغة جديدة ... بس هحاول .. هحاول عشان اشجعك انك تلاقى نازع صبار في حياتك ... صحيح موعدكش بانك بسهولة تصادفه الا لو كان مثلك الاعلى كريستوفر كولومبوس بس خليك واثق بان النوعية دى موجودة

كريستوفر كولومبوس اكتشف العالم الجديد لانه كان واثق من ان الارض لسه
محكتش كل حواديتها ... قبل معرفتها كنت واثق ان لسه في نوع من الحواديت في
قلوب الناس لسه محدش صادفه ... اهم حاجة الايمان قبل ما تدور ... الايمان
بيجلب الحظ محظوظ بحظ كريستوفر كولومبوس كل من اكتشف عالمها ...
عالم جديد من الحواديت المليانة زينة وفرح ... عالم من زغرة الروح وغنا القلب
.. عالم لو عافره احزان هتبقى في حجم الكف و بايمانها الدلم مع الوقت يبقى
الحزن دخان ويرجع كفها اللوان ويفضل عالمها فرح ... لكل العشمانين في المعجزة
عالمها فرصة بس خلى بالك زى ما لكل كوكب مجال جوى يحميه ...
عندها حدودها اللي تحميها ودة ابسط حقوقها في الحياة وبتمارسه بمنتهى الحرفية
... بتمارس حدودها عليك بدون ازعاجك او طردك لكن تفضل متمردة على كل
من حاول فرض اسلوبه عليها فارجوك كن صريح في تعاملاتك وياها عشان تقدر
تعيش لوقت اطول في عالمها ..

برغم سواد عيونها فهي عالم من النور اللي مبيخافش من العتمة ... برغم قصر
قامتها مساحة عالمها اوسع من استيعاب عقل واكبر من ادراك بشر ... هي
احسن تعريف للسهل الممتنع ... متستغربش انك تكون مبسوط برغم المسافة ما
بينك وبين تفاصيل حياتها ... متقلقش لما تنوّه وتختار فيها ومين يخاف وهو تايه
في سكة حلوة !!؟ ... كفاية انك بتبقى عارف و متأكد من حقيقة واحدة وانتا
معاها ... انك سعيد

جايز تكون جنية من اللي كانوا ييحكوا عنها في الاساطير زمان ... من الضروري
ان علماء الوراثة يدرسوا جيناتها ... لانها عندها جين زيادة وخواصه مختلفة عن

كل البنى ادمين ... جين خارق للمعادة .. جين يقدر يدخل جوارك ويسبب طفرة هائلة في كل خلايا مشاعرك وتتملى احاسيسك بالراحة والسلام والسعادة .. جين ييخلى كل شخاييط الدنيا ترسم لحدوتة اسمها " بكره احلى " .. جين ضحككتها ييخلى كل البيان مفتوحة لنور الشمس وحودايت القمر ... جين ييخلق من العدم امل ... جين ييطبطب على الوجع ... جينها مخليها متصالحة مع حياتها طول الوقت ... جين مخلى سكر قلبها مضبوط وعيونها شايفة الحياة الوان

" ما اخذ بالقوة لا يسترد الا بالضحكة " ... هو شعار حياتها عارفة ان شعاع ضحككتها يفوق سرعة الضوء .. وسحر ضحككتها بقدرات جيوش .. وانا مظنش حد يقدر يقاومها ... حتى لو فكر يعاند فيها .. لان شفافيتها رمال متحركة بمجرد رسم الضحكة كل عضلات عنادك بتنهار قدامها وتستسلم ..

ترحب باختلافك معاها في الافكار لكن هي واثقة من هزيمتك ... بس انتا في النهاية بتكون سعيد بانتصارها وفي نفس الوقت مقدرش اقول على حالتك دى " هزيمة " لانك صحيح مغلوب بابتسامتها لكن انت كسبان ومحظوظ برؤية اجمل معالم الدنيا " ضحككتها " ... لا داعى للمقاومة واوعى تعتبر دة ضعف ... فقط استسلم .. لو كانت موجودة ايام نيوتن كان نيوتن اكتشف قانون الجاذبية الارضية في ضحككتها ... القرب منها يساوى انك تبقى على البر لسه وتقول يا ناس غريق لكل العثمانين في معجزة ... لو نفسك تشتري ضحكك جديد ملوش اخر ولا اول ويكون من القلب ويجد ويكون بيلاش ... اعرفها ... هي نازعة صبار من الطراز الفريد فطوى لمن يجدها

المنقوشون على القلب

شريط حياتك هو فيلم من اخراجك ... صحيح في بعض الاوقات بتحس بعشوائية التفاصيل لكن يفضل السيناريو موجة بحكمة للنهاية .. صحيح في بعض الاوقات يبقى في تدخلات من القدر لكن اكيد بتبقى في صالح الفيلم ولخدمة السيناريو

من اهم ابطال فيلم حياتي " ١٤ " شخص ... اتعلمت منهم كثير اوى على مدار السنين اللي فاتت .. قربنا وبعدنا .. اتخاقتنا واتصالحنا ... بكينا وضحكنا ... عملنا ذكريات منقوشة على قلوبنا ... منقدرش ننسى مهما عدت الايام وفرقتنا المسافات .. عمرى ما يبقى خايف ان اكون وحدى اللي فاكر .. متأكد انهم فاكرين زى تمام ... لان اول حاجة عاشت فينا هي صداقتنا .. كل خلية من عقولنا مليانة بذكريات ممزوجة بذرات جنوننا ... كل احساس في قلوبنا ممزوج بضحكة حاسينها من جوة وعاشة معنا مع الزمن ... متأثرش بالضحكة بغربتنا ... سواء غربة المسافات او غربة القلوب في حواديت العمر .. فضلت جوة القلوب حكايتنا مهما قسى الزمن ثابتة ..

رقم " ١ " ... هو للفظ الصداقة مرادف ... لو ساب في يوم مكانته يفضل المكان فاضى محدش يقدر يسد ... مش عشان مساحة طول له ولا عرضه ... دة يشفع ليه بس تاريخه من المواقف والذكريات والضحك لحد ما ينقطع نفسنا .. عنده كاريزما تغلبك .. مهما حصل منه يفضل جوة قلبك مضاف اليه ... كل الحواجز اللي قابلت صداقتنا واللى شوفنا في لحظة انها اعلى منا .. ذكرياتنا

ساعدتنا نعليها لان في حاجات جوانا مبتعرفش تموت وكان لازم بيها نقدر من
الحواجز نفوت .. بعيدا عن عنف هزاره خفة دمه متقدرش تنكرها .. هو اكر
واحد يطلع الضحكة من جوانا بلون الصدق .. انا بيني وبينه حكاوى كثير ..
وحاجة تانية ملهاش تفسير .. تقدر تقول عنها اخوة بالفطرة
رقم " ٢ " .. عمره ما ييقى معاك بخيل لما محتاجه .. يوم ما تعطش يحفر عشانك
" نيل " .. هو من اهم المسببات لظهور كلمة " الجدعة " في قاموس اللغة
العربية .. بعيدا عن قصر قامته وعفاريت رخامته اللي بيحب يطلعها بمزاجه لكن
هو علامة " زائد " على كل ذكرى او موقف يتوصف بالروعة ... شعاره دائما "
ياللى خايف من المغامرة اية فايده تكون مركب واقف على البر !!!؟ " ... عنده
استعداد للتجربة ... عنده احلامه الخاصة ... عنده شخصيته اللي بيحبها
ويجبرك انك زيه تحبها وتحترمها

رقم " ٣ " .. لون الاختلاف المميز في وسط قوس قزح صداقتنا ... معندوش
زحمة في قلبه وواضح وصريح .. شخصية التاجر الشاطر محتلة المركز الاول في
تعاملاته معانا .. يقدر يكسبك وميعرفش يخسرك تحت اى ظرف .. سكر قلبه
مظبوط .. قلبه صافي ولو كشر في يوم او زعل مع الوقت الصفا يغلب ... هو
زى البقسماط ييقرفش تحت درس الانبساط وهو صاحب المزاج المختلف في معنى
السعادة

رقم " ٤ " ... المثقف ... هو فيلم سيما ابيض واسود من الزمن الجميل ...
تعاملك معاه في حد ذاته استمتاع زى ما يكون رواية لتوفيق الحكيم ويحتاج لانك
تقراه بتمعن او كاس نبيت متعتق من مية سنة وبتسكر بمزاج لما تشربه .. هو زمن

شخايط المدرسة ولعبة الاقلام على الادراج .. هو زمن الحرية والحشيش فوق
الرصيف بدون خوف من البوليس .. بوليس اسمه الروشنة فرض علينا نوع ثقافة
مش بتاعتنا ولا تناسبنا .. لكن هو فضل صامد .. بيحشش في وسطنا بشخصيته
المتقفة واسلوبه المحترم بتاع الزمن الجميل

رقم " ٥ " ... في يوم لما ينزل خبر يقول ان الراحل بقى " نادر " وان المعظم
الموجود عيال " سكة " ابقى متأكد ان اسمه في قائمة النادرين .. لا الليل يشبه
دمعته ولا النهار يشبه ضحكته .. مؤمن بيكره انه جاى احلى بس تعب من طول
الحاضر .. عمره ما يقبل يكون اعمى في بلاد الشوف .. الحقيقة عنده مفيهاش
رتوش ولا تحميل .. هو الواحد الصحيح في زمن المايح حاكم ... اشعاره بتعكس
ملامح قلبه وبدل على انه " عبقرى " على الورق لكن محدش يقدر يعكس ملامح
شخصيته في شعر وقصايد .. محتاج للغة جديدة

رقم " ٦ " .. مطلوب القبض على " لسانه " برغم خفه دمه ... في الفحص
الشامل لضحكته هتلاقى مزيج من الحرية والجدعنة والحواديت اللى ملهاش بداية
ولا نهاية .. هو المؤلف الحقيقي لرواية " الف ليلة وليلة " لانه شهرزاد بطبعه
القصصى .. جايز تكون اغلب تفاصيل حكاياته مش حقيقية بس انتا بضحكته
وباسلوبه مضطر انك تصدقها .. مش محتاج لسماعة عشان تسمع قلبه ... كل
اللى في قلبه على لسانه عشان كدة جايز لحد دلوقت محدش قابل يقبض على
لسانه

رقم " ٧ " ... زى طفل نايم على الرصيف وخايف يتسرق .. زى مركب ورق في
بحر من خياله وخايف من القراصنة .. مشكلته بس هي الخوف لكن غير كدة

تلاقى حد قلبه من النوع الذى يتحب بدون مبرر او سبب .. هو البطل الحقيقى
لاغنية مير " قلب فاضى " لانه فعلا قلب غالى ومش بيرخص .. قلب فى عز
ربيعه بس نفسه فى قلب يخلص

رقم " ٨ " .. خايف فى يوم يفرح لا الحزن يزعل منه .. ومع انه شارى هموم من
سوبر ماركت اليأس لكن لسه عايش بامل بكره .. هو دليل على ان مهما القلب
عبي من جراح الدنيا بفضل فى براح يعاقر جوة قلوبنا عشان يعيش لبكره ..
متعشم فى معجزة لكن ميعرفش ان انتظار المعجزة ييمنع ساعات وقوعها .. قلبه
ايض مهما قال ومهما عمل .. عشان كدة لسه قادر فى الحزن يفرح

رقم " ٩ " ورقم " ١٠ " ... من يوم ما فتحوا عيون قلوبهم على الحب وهو
عارفين ودارسين سكة الاحلام الللى متعرفش المستحيل .. من اول ال " ١٤ "
الللى حبوا وكتبوا سطور من نور فى كتاب حواديت الهوى .. علمونا ان الحاجة
الللى تفرح قلبك امسك فيها ... واننا نقدر نكون اهم المسببات فى سعادتنا بس
احنا نصدق .. وان الحقيقة مش بس بتسكن العقول لكن بتعيش فى القلوب
رقم " ١١ " ... هو الجنون العاقل الللى حياته بيأتمها مع الوقت بتفتح .. جايز
يكون سيناريو حياته شقى مع الزمن بس هو كان فيه خيط رفيع مصدق بان بكره
هيدفع مهره ويكتب كتابه على السعادة زى ما كان طول عمره بيحلم .. كان
عشمان اوى فى ربنا من صغره وعشان كدة كان لازم الدنيا تضحك عشانه ...
من قريب فتح عيون قلبه على الحب وسكن عالم الاحلام الللى بتدخل سينما
الواقع

رقم " ١٢ " ... الدنيا بتاعته فيها حنية وقسوة .. طول موجة ضحكته تناسب
طرديا مع همه ... ورا قناع التهريج والتكيب فى احلام بتعافر عشان تعيش ...
الساعة معاه بسنة ضوئية من الضحك .. مهما كان بعيد بتحس بطعم عشرته فى
لحظة تبقى فيها معاه .. الظروف ماردا لكن بضحكته هو اقوى .. وهو لازم
يصدق قوته عشان لو حس بضعفه هتهرب منه الاحلام اللى عايش لسه عشانها
رقم " ١٣ " ... هو عبارة عن " تفكيره " .. بينحت كرسيه فى الدنيا ويحارب
عشان يغير خريطة دنيته .. ميقبلش حد يدخل يغير من مبادئه اللى مؤمن بيها ..
جوة منه شريط طويل من الذكريات بس فاهم ان الفيلم لسه .. عشان كدة
مبطلش محاولة .. جايز ساعات بيخاف وساعات بيهرب ... جايز ساعات
يشوف الوحدة طريق ومحدث قادر يفهمه .. بس لسه بيقدم على تأشيرة الفرصة
ويحاول

رقم " ١٤ " ... البساطة كائن حى قادر على التعايش فى زمن التعقيد بعضلات
قلبه وضحكته .. عنده جوة منه سكة الحياة فيها بتجرى مبسوبة .. عارف يعنى
اية الحياة هى اللى تدور عليه عشان تعيش !!؟ .. جايز يكون بيخاف من
الكلاب وجايز يكون بيخاف من الحشرات لكن انا مصدق انه مش بيخاف من
الحياة

١٤ شخص هما اشخاص معادلة مايتنسوش ... فى حالة الضحك يتقلبوا " ضرب
" وفى حالة الهم يتقلبوا " طرح " وفى حالة الاحتياج يتقلبوا " زائد " وفى كل
الاحوال عايش حياتى معاهم بال " قسمة "

الآن

احيانا فى بعض الاختيارات فى حياتنا بتحتاج لكثير من الوقت وفى احيان تانية الوقت بيحتاج منا لكثير من الآن ... الوقت بيمر والحياة قصيرة مفهوم الصدفة يوضحلك اللذة فى " الآن " ... افكر اى موقف جميل حصلك صدفة وافكر كل التفاصيل الصغيرة والحاجات البسيطة اللى بتفرق اللى عملتها قبل ما تحصلك الصدفة .. هتفهم أن أى تقدم او أى تأخير فى التفاصيل الصغيرة او الحاجات البسيطة كانت هتمنع الصدفة .. اللى اقصده ان حتى القدر بيحتاج لكثير من " الآن " عشان يتحقق حتى بدون وعيك او ارادتك علمتنى برضة مستشفى الطوارئ ان " الآن " هو اهم لحظة عمرية بنمر بيها ... لحظات بسيطة وتدخلات مطلوبة وفورية لانقاذ حياة هى اللى بتخلق الاهمية الكبيرة لمعنى " الآن " ... لكن الموضوع بس مش فى الخط الفاصل ما بين الموت والحياة فى مستشفى الطوارئ اللى بيدى المعنى الاكبر فى كلمة " الآن " ... " الآن " عبارة عن الفرصة

" الكلمة المناسبة فى الوقت المناسب للشخص المناسب فى المكان المناسب " ... المثالية مش واقعية ... احيانا بيبقى الوقت المناسب هو " الآن " وانتا مش واحد بالك ... ولانك مش واحد بالك والوقت يعدى .. يضعف " الوقت المناسب " .. وبالتالى مش هيبقى المكان مناسب ولا الكلمة اصبحت مناسبة ... المثالية فى بعض الاوقات الحرص عليها خطر لاننا مش مثاليين بالاساس وبالتالى توقع

الكمال في كل حاجة بدور حوالينا وفيما نتصرف بناء على توقع الكمال ده هو " غباء "

عشان كدة بحب الشخصية الجريئة والمغامرة لانها أكثر أنواع الشخصيات احتراماً للآن .. النوعية دى هى اللى بتعيش الحياة فعلاً ... اية يعنى لو غلطنا ؟؟ .. اية يعنى لو مشينا لفترة في سكة مش مناسبة ؟؟ .. التجربة عمرها ما تكون تضيع طاقة ومجهود ووقت ... التجربة علم .. التجربة حياة ... التجربة بناء ... احنا ليه بنشحت حياتنا على رصيف الانتظار !!؟ ... احنا ليه مصرين على اسلوب جبان للحياة !!؟ ... الدنيا مفيهاش حلول وسط ولا تحب اللى بيرقصوا على السلم ... الأرض لو فكرت لحظة تبطل دوران .. الكون هيتقلب ضدها .. واننا لو فكرت لحظة انك تعيش جبان تحت خداع اللحظة المناسبة الفرصة هتقلب ضدك ساعات بنتردد في اهتمامنا بشخص ما والتعامل معاه لاننا بنحتاج اننا نعرفه أكثر لاننا خايفين مثلاً .. ساعات التردد يخلى الشخص دة يخنفى من حياتنا ... والشخص دة كان يقدر يضيف لحياتنا معنى وقيمة وفكرة وسعادة ولان اهم انواع الاهتمام هو الاهتمام بالاهتمام ... و جايز يكون الشخص دة كان محتاج " الآن " للاهتمام قصاد اهتمامه بيك .. كسلك وخوفك وقلقك يبعد الشخص عن حياتك ... وتخسر معنى وقيمة وفكرة ولحظات سعادة .. ساعات بنتردد في قرار شغل لانه مرتبط بسفر وتغيير ظروف حياتنا عن الطريقة الروتينية العادية .. والفرص ملهاش ساحة انتظار في اغلب الاوقات خصوصاً في مجال العمل ... وتروح الفرصة من ايدينا لان الشركة او مجال العمل كان عاوزنا " الآن " ..

ساعات بتتردد في التعبير عن مشاعرنا محيطية اللي بنحسه ناحية سدة .. والحد دة
ينصاف انه شخص رائع جدا وفي ناس نائية معجبة بيه وتعبير عن اعجابها له
قنك ... وانتا كان المفروض نخرج مشاعرك " الآن " .. وتنتهى الرواية بانك انتا
ومشاعرك محبوسين في زنزانة السكوت ومستنين حكم النسيان .. عشان كدة لو
حييت حد عبر عن مشاعرك ... متخلقش مسافة بين قلبك ولسانك .. حجم
المسافة دة ييساوى حجم عذابك ... بعيدا عن كل الشروط المطلوبة في التعبير
عن الاحاسيس اللي الجميع ينصحك بيها ... كلهم اتعذبوا وبيعذبوك معاهم ..
لو افترضنا انه مش بيبادللك المشاعر على الاقل وفرت قسوة الانتظار .. ولو كان
بيبادللك المشاعر يبقى قدرت تكسب وقت اكر في سعادة الحب ...

ساعات بتتردد في التصالح مع حد لان الكبرياء اللي جوانا يحتاج وقت للسيطرة
عليه والخضوع لانسانياتنا وكل يوم نقول في يوم هنتصالح وفي لحظة تروح قيمة "
الآن " ... يجي بكره في يوم من الايام بدون الشخص دة على قيد الحياة ..
وتضيع فرصة انك تتصالح معاه ... ويفضل احساس الذنب جواك يطاردك في كل
ركن في تفكيرك ..

ساعات بنحط الظروف في جدول مستقبلنا ... مع ان بكره لازم ميعرفش الخوف
عشان نوصل .. ومع اننا لو تعمقنا اكر هنفهم اننا سبق ومرينا بظروف وكنا اقوى
... وان من الممكن الظروف تحصل دلوقت ومن الممكن متحصلش .. وان
التفاصيل التشاؤمية اللي بنضيفها في خيالنا واحلامنا بتقتل احلامنا بالبطى ..
عشان كدة اهتمامنا اكر ب " دلوقت " وحرصنا على نزع كل الاسلاك الشائكة
اللى ممكن تعوق " الآن " هو الاسلوب الصحيح للنجاح

نصيحتي ... البس مريلة المدرسة الكحلى فى افكارك ومتحملش الهم وعيش طفل
وجرب .. عبي قلبك بالامل وعيش ببراح الطاقة اللى فى روحك ومتخافش ..
طلع الغنوة اللى جوة مشاعرك بصوت عالى وافرح بحقيقتك وغنى بيها ...
واستخدم عقلك فى تمييز الفرصة وانها متبقاش ذهب قشرة ... مع العلم بان حتى
اصعب الفرص لو طعمها مر فى الاخر بتقوى فى جدر كيانك .. وبكره براعم ورد
احلامك من وجع التجارب راح تطرح ... صدقتى مدرسة " الآن " هى المدرسة
اللى لسه عايشة وتعلم ويتطلع اجيال ناجحة لحد " الآن "

الفراق

أصعب لحظة هي اللحظة اللى فيها أهم جزء فى حياتك قدريا يفارقك ومتقدرش تمنع .. تبقى عاجز قدام المارد البارد الغير رحيم فى علم المنطق المحدود الخاص بعقولنا ومشاعرنا ... اشخاص غاليين علينا فارقونا بغير ارادتنا او ارادتهم لكن لان دى كانت حكمة وترتيب القدر الصحيح فى مواعيده دائما ...

اعز الناس لما يفارقوا عالمنا بنحس اذ اية عالمنا دة فاضى وواسع علينا ويبدأ احساس الوحدة يتسرب ما بين فراغات خوفنا لاعماقتنا ... انفاسك المتقطعة بالبكاء سابقا على حبيب غالى عليك سواء اب او ام او اخ او اخت او صديق او حبيب ويقرر الموت انه يخلق مسافات ما بينكم تبقى انفاس محروقة برماد الذكريات جواك ... بتحس اذ اية انتا صغير وساذج امام قوة الموت لكن يفضل جواك سؤال يطاردك فى حزنك وفى وحدتك ومكتوب على حيطان حياتك فى كل ركن منها مع صوت نبضات قلبك الحزينة فى خلفية المشهد وتسأل .. الناس اللى ماتت دى لسه حاسة بينا !!!؟

جائز كل شئ يموت فى الخارج لكن فى حاجات جوانا ميتفعش تموت ... هى مدينة حياتها احتلت ببرودة الموت اللى اتسرب فى كيانها فى عز شبابها وكانت لسه بتحسس طريقها فى العالم .. والدتها كانت الايد اللى بتشدها لبكره واللى بتأخذها بضحكتها وبحنيتها لعالم ملوش حدود من السعادة والامان ... كانت هى السبب فى رسمه ملامحها اللى بتضحك للدنيا ... لكن الملامح بفراق والدتها

اترسمت بشكل مختلف .. لما تبص في المرايا مش بتشوف غير بنت وحيدة
ومجروحة من غيرها ...

اصعب احساس مش بسبب احساس الفراق لكن احساس الخوف من بعد الفراق
... بيحاولوا يقنعوا فيها بان لازم تعيش حياتها وان والدتها لسه شايفها وهتأخذ
بالها منها ... خايفة تصدقهم ومتبقاش دى الحقيقة .. وخايفة تكذبهم عشان هي
محتاجه لانها تصدق ..

عارف يعنى اية احساس ميعاد مقابلة حبيبك يبقى مؤجل لاجل مستحيل !!!
... احساس بيخلى الجسد يرتعش وكل ذكرى تخطر في بالك تخرج دمعة من قلبك
والروح تغيب بين غيوم الحقيقة اللي بتوجع .. اللي بنجبه مش هنقدر نشوفه بعيننا
.. صور اللي فارقونا بتفضل هي صورنا المفضلة اللي بنجرى عليها وقت ما نحس
اننا محتاجينهم .. وغالبا طول الوقت ... بستان الشوك يكبر في روحك وروحك
متبقاش فاكدة شعاع النور اللي بيفرح ... هو دة اللي كانت بتمر بيه ونفسها
تدخل في آله زمن يرجعها طفلة ويرجعها لوقت كانت مبتفارقش فيها حضن
والدتها ... ويكون معاها مصباح علاء الدين وتتمنى امنية انها متكيرش ابدا والزمن
يقف عند طفولتها عشان تفضل اللحظة اللي فيها زهرة حياتها موجودة معاها
للخلود

لكن يفضل السؤال الصعب من غير اجابة ...

وفي يوم من الايام اللي بتعيش فيها وسط ذكرياتها كانت على ميعاد مع شوكه
تانية بتحاول تكبر في قلب قصتها ... ماس كهري ونار بتحرق في كل ركن في
بيتها ... مبتتش عارفها تعمل اية غير انها تصرخ بصلاة ... الموت لسه مصرة

على انها يغير من الرواية انها تمشى فى الانتحاة الطبيعى ... بيعاند ويضحك فى
وش قلبها بمنتهى الكبرياء .. النار بتجرى تحرق فى قلبها جازيز أكثر من حرقها فى
اثاث البيت ... الخوف عمال بيكبر مع قرب النار ليها .. حاسة انها على وشك
النهاية .. الانفاس بتخرج منها بمنتهى الصعوبة .. الموت يقرب أكثر وأكثر
لكن فجأة كل شئ ينسحب .. والنار فجأة استسلمت ... اتراجعت وانسحبت
وسابت ركن البنت من غير ما تحاول تهاجمه ... شئ عجيب وشئ يحير
مع ان السواد بقى لون الحيطان ومع ان البيت اتحرق ومع ان الاثاث اتحول لرماد
ومع ان البيت طعمه طعام الذكريات والطعم الحلو بالنار اتحول لمر ومع ان
الطبيعى انها تصرخ أكثر وترجى الظلم انه يحن فى احكامه .. لكن كانت
بتضحك ..

كانت بتضحك يجد ومن قلبها وكانت دموعها بتخرج فرحانة اوى ... مش
عشان هزمت الموت فى لحظة معجزة لكن عشان حقيقة تانية كانت هى مستنياها
من زمان اوى ... اجابة السؤال الصعب اتكتبت من تراب الرماد و خرج غبار
امل ضحك قلبها من تانى

ركن البنت اللى النار مقدرتش تقرب ليه كانت البنت فيه واقفة تحت بربواز لصورة
والدتها .. الركن الوحيد اللى النار ضعفت قصاده ومقدرش تقرب منه و البرواز
فضل زى ماهو ييلمع زى النجمة فى سواد الليل والصورة صورتها اللى لسه
بتضحك بتحدى وبصدق ... ساعتها فهمت ان والدتها لسه بتحرسها ..
ساعتها فهمت انها هى لسه الحماية ليها وانما هى لسه الايد اللى بتشدّها
لبكره

القلوب الدافية

فى مشاكلنا بنطلب النصح من الاخرين بس ساعات اكر حاجة بنبقى محتاجينها
بس ان حد يسمعنا .. مش اكر من كدة ... حتى لو احنا مقتنعين جدا اننا فى
النهاية مع المشكلة لوحدنا ..

عملى كطبيب عرفنى حقيقة مهمة .. اننا كلنا بنعانى .. وان اهم حاجة فى المعانة
اننا نسمع بعض .. ونسمع من قلوبنا

ملاحظها بتعكس تاريخ .. كل تجعيدة فى وشها بطعم البيوت القديمة العتيقة المليانة
بالخير والعيشة بالصمود ... عينها العسلى اللى تقل الجفون من تقل السنين بدأ
يخبىها مقدرش يخبي سحر نظراتها الحنية ... عيونها كانت سيل من المشاعر الدافية
اللى فى تلاقى نظرتنا حاويتنى كأن عيونها فيها شئ منى ... صوت خطواتها البطيئة
زى كتاب حواديت يتحركى بصوتها براحة وبهدوء عشان تعشق القصة اكر ...
مش محتاج تسأل عنها او تعرف حقيقة منها هى من اول نظرة بتفهم ... هى أم
بابتسامة طالعة تعافر وسط شقوق وشها زى الشمس بتخرج تتسحب فى اول
الفجر كانت بتبسم ليا .. انا مكنتش شايفها مريضة ابدأ ولا حسيت بلحظة
بعجزها ... انا حسيت بعجزى انا وصغر حقيقتى قدام حقيقة عايشة بصمود
قصاد مارد الزمن بمنتهى القوة ... انا شوفت تاريخها المشرف من لوحة ملاحظها
وابتسامتها المستمرة اللى بحكايتها اللى اتفاجئت بيها اتأكدت اكر من ضعفى
وعجزى

نظقت بالسلام ودفا صوتها برغم رعشته وصل لروحي وحسيت ساعتها بانى قدام شخص مش عادى ... رديت عليها بابتسامة اعجاب وصبحت عليها بالخير اللى هى سبب من اسبابه ... كانت اول جملة نطقتها هى الدعا قبل حتى متقول شكوى مرض ... عرفت وفهمت انها عايشة تشكر وانها مهما عانت بتسكت ... كنت مبسوط جدا بالدعا منكرش لاني عارف ان ابواب السما عشانها هى بتفتح وان جناين الحياة بتتروى بدعا الام ... طوبى لاولادها

بدأت تتكلم بصعوبة وكان واضح جدا انها محتاجة لحد يسمعها دلوقت ... صحيح الصمت فضيلتها المفضلة لكن قطر العمر يبعدى و خايفة تموت بالسكوت ... معرفش انا سبب راحتها فى الفضفضة ولا كوم الوجع اللى بيزيد عليها كان اكبر من احتماها .. بدأت تخرج كمية ضخمة من الادوية لكوم من الامراض اللى اغلب المسنين يبعانوا منها ... بدأت تحكى وتتكلم بدون ما اقاطعها لانها كانت اخر مريضة فى العيادة وانا حسيت باحتياجها للكلام وكأن الكلام كان واحشاها ... حسيت كأن جواها الف كلمة لسه مقالتهاش .. حسيت ان لسه الحكاية غامضة .. حسيت ان العيون لسه مخيبة وجع ..

بعيون متركزة عليا وكأنها مستتية رد فعلى لما تنطق بالحقيقة .. بلحظات تردد بتحتمى فى سكوت لحد ما يتجمع فى القلب شجاعة بانه يحكى .. وانا مش بمحاول اعدل من قرار صمتها بنفسى ولا استفسر عن شكوى تانية لاني كنت حاسس ان الحاجز ده هى اللى محتاجة تكسره .. عشان كده فضلت ساكت زيتها ... فى وشوش بتعكس قلوب .. وفى وشها حسيت بان حكايتها مخلصتش .. كل المساحات ما بينى وبين سرها ضاقت لما كشفت عن دراعها

كدمات مختلفة بمجرد ما شوفتها ويرغم انى ياما شوفت حوادث واصابات
ومفروض بحكم عملى انى اكون اتعودت لكن ضعفت ... هى ضعيفة وهذيلة
وحجم الكدمات كان مخيف ... جلدها المتكرمش من صراع الزمن مكش يحتمل
صراع تانى .. بصوت خايف من الاجابة سألتها عن سبب الكدمات ... عرفت
ان اكبر كدمة فيها كانت على اوضة قلبها .. كانت الاجابة " ابنها "
يتسحب من رئتيك هوا الحياة لما تعرف حقيقة توجعك وتندفع دموع من قلبك
لعينيك بحكم الاوضاع اوقات تمنعها .. منعت نفسى لكن لو كانت دموعى
خرجت كانت هتهتف بغضب " هى ام رائة واحنا الاناء كلنا اوغاد " واحدها
فى حضنى واعتذر لها ... اعتذر لها عن قسوة ابن على أم منحتة الحياة و السعادة
والراحة والامان والسلام وهو منحها الآه والوجع والالم .. اعتذر لها عن كسرة
خاطرهما وقلبها اللى عاش وعافر وكافح مش عشانه لكن عشانه وفى النهاية داس
هوا على قلبها بمنتهى الكبرياء .. اعتذر لها عن تاريخها المشرف اللى صمد قصاص
مارد الزمن لكن مكش فى لحظة يتصور انه يصمد قصاص اهم جزء منه ...
خرجت دموعها مع ابتسامة رضا وصوت صافى زى قلبها بتقولى انها عارفه انه
بيحبها ...

فى كلام بنقوله واحنا مش مصدقينه لكن بنقى عاوزين نصدقه عشان نرتاح ولو
بنضحك بيه على نفسنا ... كان كلامها من النوع ده وازاى اقولها " لا مش
صح " ... ازاي مخليهاش تصدق كدها اللى هى محتاجة عشان تعيش تصدقه
... كنت فاهم دايم حقيقة فى قلبي انك لما تحب حد على قد حبك هيكون

حجم احتمالك ... لكن مساحة حبها اكبر من مساحة الكون وعمق احتمالها
محتاج للغة جديدة عشان اوصفه ..

وصفت ليها علاجها من الناحية الطبية لكن من ناحية القلب مع انى عارف انها
كل يوم بتططب على روحها وبتحضن فى قلبها عشان يناموا مرتاحين
وميحسوش بالوحدة اتخطيت قواعد المهنة ... اى قواعد وهى انسانة فوق مستوى
البشر ... على ايدها انخيت وقبلتها كتكريم واعتذار كان لازم يتقدم لأم عظيمة
...

خرجت هى لمصيرها وعارفة انها فى النهايه مع المشكلة لوحدها لكن كانت بس
محتاجه لحد يسمعها ... وكان من نصيبى انى اكون الحد دة ... سمعتها من قلبى
وعرفت اننا كلنا بنعانى بس مافيش داعى نفضل انانيين بالشكل دة واننا نفكر فى
ان " كلنا " بتشمل افراد احنا كشباب مش بنلاحظهم فى معانتهم ... اهم ناس
تعبوا عشاننا ومحتاجين لاعظم شهادة تقدير على تضحياتهم لينا ...
كثير مننا بتسرقهم الدنيا وينشغلوا ببرنامج حياتهم المهم لكن للاسف يبنسوا
الشخص اللى منح ليهم السعادة والحياة ... يبنسوا الشخص اللى احتواهم وهما
اطفال عشان يكبروا ويبقى ليهم احلام وطموحات ومستقبل .. انا يومها قررت
ارجع بيتى واول حاجة اعملها انخى لايد امى واقبل الايد اللى خلتنى بنى ادم

عائشة ميتة!

طفلة شايقها ماشية بتمايل بمرح ... بتحرك ايديها برقعة على سنابل القمح ..
بتغنى .. متعرفش النور اللي على ملامحها انعكاس للشمس ولا الشمس اللي
بتستمد نورها منها ... روحها وضحكها بتزود الوان الصورة .. سنابل القمح في
حالة رقص بوجودها ... النسيم بيعدى بين شعرها في حالة استمتاع ...
مشوفتهوش ييجرى فرحان بالشكل دة من زمان ... يهمس مع السنابل باجمل
القصايد .. وهى زى ماهى ... هادية وشقية ... وردة بتفتح في البستان ...
فراشة على جناحها حلم ... مش خائفة ... قلبها مليان غنا ... ومافيش بين
ضلوها زحمة .. هى وقلبها وغناها

شايقه في منتهى الغضب ... غراب الموت ساكن قلبه ... سنابل القمح في طريقه
خائفة من لمسته وبتهرب بعيد .. اصل الضلمة اللي جواه كبيرة لدرجة ان ملامحه
عتمة ... عتمة مافيهاش ملامح بشر ... النسيم اتجمد في مكانه لما شافه ...
الشمس غيمت من غيوم روحه ... الصورة باهتة اوى مافيش غير ضل
ضخم لخيال شبه بشر ... مجرد مارد من البرود بيتحرك على رجلين مش أكثر ...
كان كل اللي في باله سهرة مع كاس وسيجارتين كالعادة ... كل ذكرياته سكون
... الكون في نظره مزيف ... معندوش احلام ... عارف حقيقته عشان كدة
خايف .. بيستخبي من الحقيقة بكاسه وسيجارته ... قلبه مخنوق بزحمة ...
مافيش فيه براح للغنا

من بعيد نظرة منها ومنه ... فهموا جواهرهم انه نفس الطريق ... جازيز تكون
حست بخوف لكن حبها للحياة والغنا أكبر ... طفلة وحلمها أقوى ... أقوى
حتى من ملاحمه المعتمة ..

وهو لمحها من بعيد ... مشفهاش طفلة ... شاف فيها ضعفه .. شاف فيها زيفه
... صوت غناها البعيد كان قريب اوى من حقيقته .. حقيقة انه خايف ...
حقيقة انه مزيف ... وكل ما يقرب صوتها منه يبدخل فى عتمته أكثر وصوت
الحياة منه يبروح والانسان اللى فيه ييموت ... اللحظات ثقيلة ... السنابل
والنسيم مشدودين من المشهد ... حاسين بالقلق ... لايحس شيطان بيضحك فى
خلفية المشهد ...

اتقابلوا والدنيا ضاقت على اد مساحة لقاهم ... الشيطان حضر جواه وعيونه
اتملت بالشر ... وكل البيان مقفولة ... مافيش مساحة للهروب ... شاف فى
جسدها الضعيف كاسه وسيجارتته .. قرر يشرب

عقد الغنا انفرط .. همسات القصايد اتقلبت عويل ... عضلات حقيقته الحيوانية
بتستعرض عتمتها على البراءة ... مارد البرود اتحول لمارد قسوة ... الشيطان
بضحكات مستفزة فخور بانتصاره ... الديب بينهش فى الفراشة واللحظات
ساعات من العدم .. شايف حلم الفراشة بيتحرق وقذارة المارد بتفوح ... شايف
دموعها خارجة من قلبها ... مش فاهمة اية ذنبها ! ... بتصرخ بالرحمة وهو مش
شايف فيها غير حقيقته وبينتقم ... سنابل القمح مش مصدقة انها دلوقتى بتتروى
بدموع ودم طفلة .. للأسف كابوس الواقع مافيهوش مجال لانك تفوق منه

هرب الحيوان من مسرح جريمته وساب في المكان عثمته وريحه خوفاً ويأسه وشهوته
... ومتبقاش في المكان غير طفلة مهزومة و فراشة مكسورة بمرارة كابوس في القلب
وحلم مدفون في القبر

بعد مدة اتغيرت حياتها ...

حيطان اوضتها .. احسن اربع اصحاب عندها .. راسمة على كل شبر فيهم
كوايسها ... عشان متفكرش تخرج ... عشان متفكرش تحلم ... عارفة انه امان
مزيف بس مصدقة زيفه

صندوق ذكرياتها بقي قصاقيص ورق جرايد .. كان يحكى خبرها .. كان
يتكلم على ابتلائها .. افكرت ان مجتمعها شهم وجدع ايامها ... مفهمتش غير
متأخر اوى انها مجرد خير جرنال ... وان المجتمع هيفضل يشوفها بصورة مشوهة
.. ونظراتهم هتفضل شفقة وجنبها مساحة قسوة اكبر واوسع من الشفقة ...
حكموا عليها بسجن ابدى في زنزانة العار والذل ... هي الضحية لكن المتهمه
بذنب غيرها في رأيهم ومكتوب عليها تعيش مظلومة ومنبوذة

بقي غناها وجع و كلامها سكون .. اعلى ما في صوتها صمتها .. مجرد اة مكتومة
بتعيش جواها وتكبر الة مع الوقت ومحدث فارق معاه ... حتى هي نفسها
اتعودت على الالم والصمت ومبتتش فارقة مع نفسها ...

كل يومياتها نفس الكلام ... بيعيدوا مشهد الاغتصاب كل يوم بنظراتهم وبعيونهم
وبلسانهم وبافكارهم .. كلهم مقتنعين بانها بريئة .. بس كلهم بيعاملوها على انها
المذنبه ... بتتعاقب على انها مظلومة ... بتعاني من جبروت مجتمع معندوش رحمة
... بقت بتتمنى الموت في كل لحظة .. غراب الموت سكن قلبها

ولاد الشوارع

المسخة الكبريون من الكابوس ... على حياتهم ... في حياتهم العنكبوت على
اعلامهم قتل قتلته وعمل مصيدة تشبه الخبث لكل امل ... نكل نور ..
ارواحهم الحبست في دوامة ... بقوا بدور مدفونة في ارض الوجع ... ميعرفش
صمم البيوت .. اسعد لحظة في عالمهم احم مينوش خابنن .. بس عمره ما
حصلت ... اصبح نبض قلوبهم رعشة
الجزن هو كارههم ... والدموع انطلقت عشائهم .. بس عمرهم ما بيكوا قدام سد
... بيكوا بس في عز النوم ... جازي يكونوا بيكوا من الوجع .. وجازي بيكوا من
البرد .. والاحتمال الاكبر احم بيكوا لانهم يحلموا .. يحلموا بالحالة المستسلمة
.. يحلموا بانهم عايشين ..
الشارع هو بيتهم والعتمة اوضتهم الخاصة ... هما أكثر فئة تعيش امبارح كل يوم
... يلتنوا في دواير وبركز الدواير تكشيرة دنيا معاندة فيهم .. عمره ما واحد ليهم
عرف فرج ... والضحكة التي بعد التي من القات عمره ما جربها .. يمان
نفسه كل يوم ليه الشمس بتشرق في كل حدة الا عنده !!! .. ليه حريقه اجير
فدم والكل معتبر انه الشوارع هي ارضه وتعايشوا على حثيفة بتقتل فيه !!! ..
ليه محمش يحاول اصيل كرم الوجع الساكن فيه !!! .. محمش ليه فاهم ان
عبرتهم بغمض بنبض ضلعة عبرتهم ارحم من ضلعة حياتهم !!!

هو أكثر واحد يحس بالبرد في الشتاء مش عشان هو طفل شارع والبرد مبرحش ... لكن عشان مش لاقى الدفا في عيون اللي حواليه ... بيتخيل انه يلاقى الدفا في السجاير الفرط .. رماد البنى ادم اللي كان فيه واتحرق ساعات بيسكن فيه روح شيطان ويمارس الشر بدون وعى .. لانه ميعرفش شكل الحنان والطبقة مستغريش قسوته .. شبع جوعه جاوز يكون لقمة ناشفة لكن شبع قلبه محتاج كثير اوى .. قلبه مافيهوش براح لاشكال الخيال والفرح والامل ..

ييموت كل يوم بقسوة مجتمع .. عالم على وش الحياة ومش غرقان وميت لكن مش معنى كدة انه حى للأسف حكموا عليه بانه مقرف وابن كلب ... كأنه هو اللي اختار عشته ... محدش بيشوفه بنى ادم .. اغلبنا شايفه حجارة سودة بس بتنطق برجاء وبالحاح بانك تساعدو ولو بلقمة ناشفة ... وبرضة مش بنساعده ... حتى شبع الجسد بنعاندو فيه ... يوم ما يموت مش هيموت من الوجع اللي عايشه كل يوم ولا هيموت من المرض اللي بينهش في لحمه كل يوم ولا هيموت من الجوع اللي مصاحبه كل يوم لكن هيموت من المرض المزمن اللي فينا احنا " عدم الرحمة "

الغربة جواهرهم قلبت وطن ... ولاد شوارع والحوارى سكة حياتهم على مر الزمان ... عنواهم خراب وجحيم على الارض خالى من ولو خيط امل ... احساسهم وجع وبراح سكون مليون بمشاعر كبت مع الزمن و في يوم هتفجر ... ولاهم ساكنين في غربة لوحدهم .. وميعرفوش شكل الوطن ... يوم ما ينفجر كبتهم هيخرج الكبت واليأس والعتمة اللي فيهم وتسود على المجتمع ... والباشا والبيه

والهائم اللى بيحرقوا قلوب ولاد الشوارع بسيجار قساوة النظرات والعبارات كل يوم
هيجى يوم ويتحرقوا من ولاد الشوارع و بنفس نارهم ..
حياتهم هى النسخة الكربون من الكابوس ... فى حياتهم العنكبوت على
احلامهم قتل قتلته وعمل مصيدة بمنتهى الخبث لكل امل ... لكل نور ..
ارواحهم اتحبست فى دوامة ... بقوا بذور مدفونة فى ارض الوجع ... ميعرفوش
طعم البيوت .. اسعد لحظة فى عالمهم انهم ميقوش خايفين .. بس عمرها ما
حصلت ... عشان اصبح نبض قلوبهم رعشة .. ويوم ما يبقى نبض قلوبهم
غضب وثورة ... اول ناس هينتقموا منهم هما احنا .. وبكل الخجل من نفسى
وحالنا بقول اوقات كثير من حقهم

زغزغة الروح

زغزغة الروح هى موهبة من الممكن كل واحد فينا انه يمتلكها .. ويقدر بيها يوصل لروح اللى قصاده ... ويقدر بيها يتغلغل فى ارواح كل اللى حواليه من اهله واصحابه وحتى بالمعرفة البسيطة جدا بعد السيطرة التامة على قدرته وموهبته يقدر يحقق المقدرة دى ... وبعد الوصول للروح يقدر يخلق روحهم تضحك وتطير من السعادة والحرية والثقة والحب .. الموهبة دى بسميها " زغزغة الروح "

فى بعض الاوقات كل اللى بتحتاجه لما تحلم بانك عاوز توصل للقمر او عاوز تحس بدفا الشمس انك تتعامل مع الشخص المناسب فى اللحظة دى .. لان لحظاتهم سحرها فى جمال الذكريات الحلوة ... لحظاتهم رؤعتها فى احساس الدفا والامان .. لحظاتهم هى سبب من اسباب زوال الالم والوجع ويمكن التحسن فى حالة طقس حياتك يفضل مستمر بفضل استمرار التعامل معاهم

زغزغة الروح هى القدرة على انتزاع الضحكة الحقيقية منك بدون ارادتك وبدون ترتيبك الخاص بخصوص توقيتات السعادة .. جمال القدرة فى انها مش مرتبطة بمجهود يذكر او بترتيب مسبق لكن هى موهبة فى قلوب ناس انها تسعدك من جواك بتعاملك معاهم .. مش شرط تكون طريقة كلام معين او اسلوب شخصية هو المحور اللى بدور عليه " زغزغة الروح " ... الموضوع ابسط من كدة

الموضوع سحره في البساطة ... الموضوع تركيبته في الايمان .. كونك مصدق انك اعظم المخلوقات اللى خلقها ربنا هو سبب كفاية انك تحس بالراحة والثقة والسلام جواك ومن هنا تقدر تمارس موهبة " زغزغة الروح " في كل اللى حواليك .. جايز يكون قدرتك على زغزغة الروح في كوميدية شخصيتك .. جايز يكون قدرتك على زغزغة الروح في جمال صوتك ... جايز يكون قدرتك على زغزغة الروح في سحر ضحككتك .. جايز يكون قدرتك على زغزغة الروح في اسلوب قلبك ... جايز يكون قدرتك على زغزغة الروح في موهبة عزفك .. جايز يكون قدرتك على زغزغة الروح في تعبيرك الكتابي ... جايز حاجات كثير جدا تكون جواك مليانة بموهبة زغزغة الروح بس انتا مش شايفها او مش مؤمن بقوتها

انا اعرف ناس كثير جواها امكانيات لزغزغة الروح بس جايز تكون عارفة وبتمارس الموهبة دى فعلا وجايز تكون مش عارفة وجودها وبتمارسها بدون ادراك او وعى...

عارفة انها موهوبة في العزف لكن لازم تصدق ان قدرتها على العزف مش بس على البيانو لكن عندها قدرة على العزف على الروح في الشخص اللى كسب فرصة بانه يسمعها .. صوتها بسيط بس طعمه مسكر في روحك وكأن ملاك قرر ببساطة انه ينزل مخصوص عشانك و يرثم في ودان قلبك .. صوتها لحن مافيش ملحن يقدر يجاريه لانه ببساطة لحن مقدم من السما اهداء عشان يزغزغ روحك

تخيل انك لما تبقى اسلوبك " ابيح " ساعات تبقى زغزغة .. جابر لان ارواحنا
مش دائما بتحب الاستقامة ومحتاجة لاوقات فرفشة .. هو احسن اصطباحة
للضحك لما تصادفه وهو احسن كوباية شاي للروقان لما تحتاجه ... منكرش انه
يفضل برغم الداهية اللي هتروح فيها بمعرفته في النهاية خطية مريحة لزغزغة الروح

قلبيها زغزغة ولو كنت صاحب فرصة انك تعيش في يوم من الايام في قلبها فانتا
هتعيش حياتك بدون برد .. ميزتها ان قلبها بسيط تحبه تشكله مركب ورق يمشى
في بحر خيالك وساعات تتحول لسندريلا وتتمنى يوقع منها حداثها على باب
احلامك .. ببساطة اسلوب قلبها مصدر زغزغة لروحك بشكل صعب تفسيره

تخيل انك تبقى مستعد انك تصاب بانفصام شخصية بس عشان متبقاش وحيد
.. هو ببساطة مبيعرفش يكون لوحده .. عنده خياله وعبقريته وثقافته اللي يخلوا
حياته زحمة من الحاجات اللي بتفرق .. من الحاجات اللي بتخلي شمس حياته
مبتغيش .. عمر ما الليل سكن ضحكته .. ضحكته اللي طردت مدرج في الكلية
بسبب جرأتها انعكاس لحقيقة جواه بان الابتسامة انطلاقة روح وتمرد على عناد
الحياة معانا ... عشان كدة هو شخصيته زغزغة

قلشه وبرغم اعتراضى الشديد على موهبة القلش لكن في النهاية متنكرش ان الروح
ساعات بتحتاج للنوع دة من الضحك .. ازاي تبقى على اخرك من القلشة
وتضحك !!!؟ .. افكر دائما الزغزغة الجسدية لما تبقى على اخرك عشان

الشخص يطل الحركة فيك لكن بمجرد انتهائها بتحس باللذة اللي كنت فيها ..
في بعض القلش زغرغة

سحرها يتناسب طرديا مع خفة دمها ... شمس بتشرق من الغرب عشان اختلاف
اسلوبها عن المعتاد بس في النهاية شمس وفي النهاية بتشرق جواك بنور يفرحك ...
من الغرب ليه؟؟ عشان رخمة ... ايوة رخمة بس في اشخاص كدة رخامتهم بتبقى
زغرغة لان الرخامة اللي فيهم مسكرة

هي من الممكن اختصار كل السحر في ضحكها .. النفزة اللي مع رسم
ضحكتها هي الحفرة اللي وقعوا فيها كل اللي فسطوا من الضحك بسبب الزغرغة
اللي عملتها ابتسامتها في ارواحهم .. امتصاص صدمات الغضب وعواصف الهم
ورياح اليأس ما بين شفايفها لما تضحك ليهم .. ازاي ضحكة تقدر تحي وردة من
قلب الشوك وازاي ضحكة تقدر تنجد غريق في عمق محيط هي دي قدرتها على
زغرغة الروح

اسلوبها في الكتابة سبب سحرها ... بتلمسك بقوس قزح بكتاباتها فتغير لون
حياتك لالوان تانية انتا مش متعود عليها ... روحك لما بتشوف الالوان بتضحك
وبتفرح .. كتاباتها سوق امل وسوق زغرغة

في النهاية سجن الجسد موجود لكن الروح متعرفش قضبان .. حياة الروح في

حريتها وسرها فى انطلاقها .. عشان توصل لجمال الروح لازم تستوعب حقيقة
روحك .. اوعى من الحراس دول " الخوف والخجل والكسوف والضعف " اوعى
انهم يلحقوا القبض على روحك ... مافيش حد يقدر يزغزغ روح اللى قدامه وهو
نفسه مش مستمتع بجمال روحه ... ومافيش قلب خايف يقدر يحلم .. ومافيش
روح خجولة تقدر تغامر .. ومافيش فى الروح براح للضعف الا فى الجبان .. الغى
كلمة " حدود " فى مكونات روحك ..

ناس كثير بتعيش حياتها بخطوط وبتحسب الخطاوى وبت رسم الدنيا باشكال ثابتة
من الاحلام والافكار ...

هنا فى خط الايمان المفروض عدم تجاوزه وانك تبخر فى فهم الله هو كفر بالله ..

وهنا فى خط المجتمع المفروض عدم تخطيه لانها عادات وتقاليد وثقافة والعبث فيه
كأنه عبث بالتاريخ ...

هنا فى خط الروتين وبالرغم من الاعتراف العقلى بعيوبه لكن فى الاول والاخر
يفضل هو الامان والمهم اننا عايشين ...

وهنا فى خط النمو والمرسوم بشكل ثابت وبتعدل معروف لكل اللى حواليك وانك
تتجاوزه لا يحسب تطور لكن فى نظرهم تمرد ..

للاسف الخطوط افسدت انطلاقه ارواح كثير كانت تقدر توصل لموهبة زغرعة
الروح بس فشلت .. وعشان كدة بطلب منك مع احترامى لكل الخطوط المرسومة
ليك انك متعاملش معاها بحرص وبانها اسلوب حياة مفروض عليك .. الله
خلقك اتا مش الخطوط هى اللى خلقتك .. ادى مساحة لروحك فى انها تخرج
من الخطوط الاعتيادية فى حياتك وفى شخصيتك ... ساعتها هتفهم اكر
وهتس بطعم السعادة اكر وهتشبع من جواك اكر

المثالية

فاكر لسه اول مرة اعيط بحرقه لما مدرس فى الفصل ضربنى ظلم عشان بكلم اللى جنبى مع انى كنت بكلمه فى الدرس بس مكنتش كفاية بالنسبة له كمبرر وضربنى فيما اعتبرته انا " ظلم " .. فى المرة الثانية لما اتكلمت ودافعت عن نفسى لما حصل نفس الموقف مع مدرس تانى ... اضربت برضة فى النهاية ... الواحد وهو صغير برضة ممكن يحس بيأس واحباط مع تكرار نفس الجرح ونفس الظلم واحنا صغيرين وقلوبنا فى حجم كفوفنا الصغيرة ومش حمل تكرار ظلم ... لكن انا معرفتش الاحباط واليأس ... فى المرة الثالثة " واوعى تفكر انى بكدة مشاغب هى مجرد صدف " لما مدرس فى حصة احتياطى ضرب الفصل كله عشان عاملين دوشة لكن انا ساعتها الوحيد اللى كنت بذاكر وهو قرر انه يعاقبنى زيهم .. اعترضت للمرة الثالثة ... بس المرة دى جابت نتيجة ومديرة المدرسة انصفتنى واتعلمت ان المعافاة فى الحق حق وان المثالية خيال علمى

الواحد لما بيكبر بينسى اللى اتعلمه من صغره .. بينسى ان الحياة عاوزه شخص يعافى ويحارب .. وعازوة شخص يتألم ويتوجع عشان يكبر .. افكر نفسك قبل جرح قوى او تجربة صعبة معينة حصلت من فترة وشوف نفسك دلوقت .. لو لقيت نفسك اتغيرت للاحسن فدة بفضل جرحك وتجربتك .. لو لسه واقف فى مكانك فدة لانك متعلمتش من جرحك .. لو بالعكس حالتك بقت اسوأ فدة لانك لسه لحد دلوقت فى مرحلة الدهشة وتوقع المثالية

فى نوعىة بتكره حىاتها بسبب جروحها تفكر الحىاة ما نعرف كرههم هتديهم
حاجة فى المقابل !! .. فى نوعىة بتكره الاخرين وتتعبير البشرىة كلها مسئولة على
تعاسها تفكر النوعىة دى هتفضل مستنىة الحب والتأيد والمساندة لحد امنا ١٩٩
.. انا اظن ان عدم توقع الشىء هو سبب قوى من اسباب عدم حدوثه لانه حتى
لو كان فى فرصة لان الايجابية تحصل من الحىاة او الناس النوعىة دى هتفوت
الفرصة ...

فى نوعىة اخطر لانها بتعيش بمبدأ الرقص على السلم ... امنيتها الوحيدة انها
تنسى جروحها ومش بتاخذ اى خطوة ومستنىة الحل السحرى " النسيان " ..
الحقىة اننا مش بنسى احنا بنتناسى وبمجرد مقابلة اى حاجة تفكرنا بمرحنا
تجرى خيول الماضى بحرق فى سكة ارواحنا وتهزنا .. النسيان مش بالطلب ولا
جروحنا شخص مؤدب لما نطلب منه الرحيل هيمشى بمنتهى البساطة من اعماقنا
... النوعىة دى اخطر لانها مستنىة فرصة مش حقىة .. شخص بيختار يكون
اعمى ويتوقع انه يشوف حىاة افضل يعتبر سذاجة ...

مشكلتنا اننا عاوزين المثالية ... غالبا مش بندور على المثالية فينا لكن بندور على
المثالية فى اللى حوالينا ودى مشكلة اكبر .. عزيزى يا اللى طالب القرب من
المثالية احب اقولك ان المثالية فى البشر ماتت من زمان .. من يوم ما ابونا ادم
سقط والمثالية فى بنى البشر سقطت ... دموعك ليها قيمة متحولش دموعك
لنداء اتكالى على ان حد يطوع ويساعدك لانك فى النهاية هتبقي شهيد نفسك
... فمافيش داعى لتوقع الكمال من الاخرين لانك انتا نفسك مش انسان كامل
..

فى حاجات مئنفعش نغيرها ... ربنا نفسه اوجد الاختلاف ما بينا فى نقط الضعف والقوة لحكمة ... عشان نكمل بعض .. وعشان نسعى لربنا لانه الكامل الاوحد ... والتجارب الصعبة اللى بنمر بيها بتساعدنا على اننا نبقى اقرب للكمال لو استوعبنا مش اكر .. اقرب فقط للكمال .. لكن برضة هنفضل مش كاملين .. التجارب اتوجدت عشان تخلىنا نعيش حياة افضل بكره ونبقى بشخصية اقوى بكره .. التجارب بتدينا فرصة لاكتشاف ماهو جديد فى عالمنا وفى اللى حوالينا ... التجربة اسلوب للمعرفة ... التجربة اسلوب لايجاد معانى جديدة وحلوة فى الدنيا حتى لو كانت اصعب واشقى التجارب .. مشكلتنا اننا بتعامل مع تجاربنا وجروحنا بالانكسار مش بالادراك للحكمة ...

الجرح عمره ما يقدر يبيت جوة قلبك غير بمزاجك .. والتجارب لو بتشوفها بعيون مهزوزة من الخوف عمرك ما هتتحرك خطوة لقدام ... لو بتشوف الخسارة قبل اى قرار فى حياتك هتاخده فانتا الى حد ما خسرت .. لو بتشوف الفشل فى السقوط فانتا فاشل فى تفكيرك لان الهزيمة الحقيقية هى انك متعرفش تقوم بعد السقوط ... الحياة قلابة ومش ثابتة على لون واحد ولا ينفع تكون ابيض دائما ولا هى ارملة عشان تلبس اسود على طول .. انتا اللى طول الوقت بتتوقع الاولى وبتتصدم فى الثانية لكن هى بفطرتها كوكيتيل الوان وعليك تعيش اليوم بلونه

انا جروح كثير مررت بيها فى حياتى ومعنديش اى مشكلة فى الاعتراف بانى كثير اتجرح .. ومعنديش مشكلة انى اعترف انى ساعات كثير بضعف .. احنا متخلقناش الهة وانا اوامن بان وظيفة الاله وظيفة غير شاغرة وفيها رب حكيم ومدبر وقوى .. لكن انا بنى ادم ليا تفكيرى وشخصيتى ومكوناتهم اللى بينها

على مدار حياتي وأكيد في جزء من المكونات عيوب اتوجدت مع مرور الوقت
ودة يخليني اغلط واضعف واقع ... وفي الحقيقة انا فخور بانى ضعيف في اوقات
كثير لان ضعفى دة هو اللى صنع فيا مميزات اكثر ... ضعفى دة عرفنى الناس
اللى يحبون ووقفوا جنبي .. ضعفى دة اللى ادانى مساحة اكبر لاني اتعلم واخذ
خبرات ليكره .. انا مش بسعى انى اكون اقوى واحد في العالم لكن انا ببقى
فخور بنفسى لما ابقى النهاردة احسن من امبارح وطموحى ابقى بكره احسن من
النهاردة .. وعشان احقق المعادلة دى لازم اشوف وادرك ضعفى ونواقصى عشان
اقدر اتطور .. المثالية تفقدك الواقعية لان ضعفك هو اللى بيعلمك بيكبرك
بيقويك ..

في حياتنا احنا بدخل حروب كثير .. في حروب مش بنعرف ليها نهاية وبتفضل
مستمرة جwana .. وفي حروب تانية بتنتهى بهدنة صعبة فيها شخص ما يبضحي
بحقه لوقت مروره بطئ وتقل بتقل الحجر على القلب .. وفي حروب تانية بتنتهى
بالانتصار ونشوة الفرحة بتحقيق حلم او هدف او حق ... كل اللى فات دة و
انا بقى بفكر لسه في الحروب اللى لسه مدخلنهاش ... العالم اللى لسه
معشناهوش ... الحروب السابقة جازي هى اللى علمتنا وكبرتنا وقوتنا عشان خاطر
الحروب الجاية .. احنا لسه قدامنا حروب مدخلنهاش .. لو احنا مصدقين المثالية
مش هنفكر في الحروب اللى لسه مدخلنهاش

أسرتي

وجود بعض الاشخاص في حياتنا مصدر الهام لسعادتنا .. جازيز لاننا عارفين من جوانا صدق مشاعرهم ودة في حد ذاته مصدر طاقة متجددة للامان والسعادة .. وجازيز لانهم اجزاء من روحنا واعماقنا مش نتيجة لعلم الوراثة لكن نتيجة لسحر العشرة واستمرارهم في دنيتنا هو اعلان بان ارواحنا واعماقنا على قيد الحياة .. ودة بيخلي ببساطة وجودهم سعادة لان وجودهم يتحول ل " حياتنا "

لما قررت اختي وامى السفر في رحلة لصعيد مصر لمدة طويلة كنت حاسس بحرية مطلقة بالبقاء في بيتي لوحدي لفترات طويلة لان غالبا ابويا ينزل من البيت عشان طلبات البيت او للمكان المعتاد ليه وهو الصيدلية اللي تحت بيتنا " بابا مش صيدلي بالمناسبة لكن مهندس بس هو صاحب صاحب الصيدلية " .. لكن اكتشفت من لحظة مغادرتهم بمعنى الصمت في البيت .. في بعض الاوقات دوشة وجودهم مش تبقى طاقة صوتية لكن تبقى طاقة روحية لاستمرار الروح على قيد الحياة .. انا حسيت في لحظة سفرهم بان جزء منى قرر المغادرة ... حسيت بانفصام جوايا ... برغم ان علم منطق الحرية يرحب بالحرية المطلقة حسيت بالانكسار .. لا يمكن الحصول على اللذة في غياب روحك .. فان كان الجسد يشبع بالطعام فالروح بتشبع باللذة ... وانا فقدت اللذة في غيابهم ..

وانا صغير كنت دائما متعود على النوم وسط ابويا وامى والعادة دى فضلت معايا لحد سن كبير يمكن لآخر مرحلة ابتدائي .. كان احساس الدفا والامان صعب التنازل عنه في سبيل فكرة النمو والنضج .. يمكن دة خلاقي الى حد ما متكاسل

ومعتمد عليهم في حاجات كثير .. بس المكسب الاكبر انى اتعلمت اكون مصدر
دفا وحياة للى حواليا على ايديهم .. جايز تكون المغامرة والشجاعة جوايا مش
بمقدار السلام اللى اتغلغل فيا ولكن يفضل مكسب قوة السلام الداخلى جواك
مصدر لشجاعتك ومغامرتك قدام فى حياتك .. فى بعض الاوقات الخسارة الحالية
بتكون لمكسب قادم ..

فى سفر واحد مننا فى البيت لفترة طويلة كان احساس القطعة الناقصة فى الروح
مشترك ما بينا .. برغم اختلافاتنا وبرغم اننا جايز نكون فى بعض الاوقات منعزلين
لكن تفضل رابطة الاسرة رابطة مقدسة غير قابلة للكسر فى قلب كل واحد فينا
ونحس باننا زى قطع البازل " puzzle " والصورة اللى بتضحك لا تكتمل الا
بوجود كل عناصر الصورة فيها

احنا زى اى اسرة مصرية عادية من الطبقة المتوسطة اللى بتقدر تعافر وسط اى
ظروف عشان تعيش وعشان تفضل ضحكتنا مستمرة وسط كل هموم الدنيا ..
وانا صغير كنت من النوع الاعتراضى اللى بيعافر بس بمخالب .. وللاسف كان
ساعات بيخربش فى اقرب الناس ليه .. فى مرة من المرات فجأتنى امى بانها باست
ايدى فى وسط الشارع كله لانى ببساطة وحشتها .. فطرة الحب اللى جواها
عرفتنى يعنى اية " بساطة " ويعنى اية " اعافر " ... الدنيا مش عاوزه خربشة ولا
النوع دة من المعافرة والحنافة معاها عشان توصل .. احنا كثير بندور على
الحاجات المادية على انها تكون مصدر سعادة لينا لكن الحقيقة ان اعماق اعماقنا
غير مهتمة بالاساليب المادية الاعتيادية للوصول للسعادة ... احنا كثير بنفهم ان
الوصول للفرحة والحب محتاج لصراعات نفسية ضخمة لتحقيقها .. لكن فى الواقع

السعادة ابسط من تعقيدات البحث اللى بنعملها عشان نوصل لمفهومها ...
والحب ارق وانقى من الصراعات النفسية الضخمة اللى بندخلها .. السعادة
والحب فطرة وطبيعة وصفات عايشة جوانا .. احنا بس محتاجين نصدق نفسنا
ونصدق طبيعتنا وببساطة نفتح باب اعماقنا عشان الحب والسعادة يخرجوا لحياتنا
احتفظ بضحكك فى كل تعاملاتك فى البيت هما كثير جدا وانتا طفل حاولوا
يرسموا ابتسامتك عشان ترغب فى الحياة اكثر .. واستحمل عدم استيعابهم
لتطورات الحياة وتغيرات المجتمع حوالهم .. لانهم ببساطة استحملوا كثير جدا فى
الاول عشانك وعشان يعلموك ابسط ابسط قواعد الحياة بانك تاكل وتشرب
وتمشى وتجرب وتفكر وتفهم وحاجات كثير اوى هما بدأوا فيها معاك ولو هما حاليا
مش قادرين فى سباق التطور يوصلوا لخط النهاية زى حضرتك متنساش اللى حط
رجلك من الاول على خط البداية ...

فخور باسرتى اللى ميعرفوش اى حاجة عن فكرة الكتاب لغاية اللحظة اللى
بكتب فيها الفصل دة ... وميعرفوش بقدرتى على الكتابة والتعبير وقدرت اخي
موهبتى عنهم وامارسها سرا ولا يعرفوا اى حاجة عن " دماغ السحاب "
والافكار المجنونة اللى خرجت فى الكتاب دة .. ببساطة انا حبيت افاجئهم بانى
ربونى وعلمونى بدون لغة معينة وبدون حروف تقليدية معانى كثير حلوة فى الحياة
وانا برد الجميل دة من خلال الكتاب .. هما علمونى ازاي احلم وازاي اكون سعيد
وازاي اعافر ببساطة وبتلقائية القلب وسلام الروح للوصول للسعادة وتحقيق اهدافى
وانا فى الكتاب بنقل رسالتهم بنفس طريقتهم بدون ما اقولكم على الطريقة
وشرحها .. انا مجرد " نور " لطريقكم زى ما كانوا هما " نور " لطريقى

رأس السنة انت الفارق

تعرفوا اننا اوقات بنبقى اصحاب كبرياء قوى باننا منطلبش مساعدة من حد ..
لكن بنطلب مساعدة من شوية ارقام !!
فى جروح جوانا بتحتاج لتدخلات بسيطة منا او من الناس اللى بيعجبونا عشان
نتنصر عليها ونداويها ونقدر نعيش معافين من جديد .. وفى جروح بتحتاج
لتدخلات اقوى عشان نتغلب على صعوبتها ونقدر نستعيد جسور الثقة ما بينا
وبين الدنيا .. لكن فى جروح اعمق واصعب .. مبيقاش قدامنا وسيلة لاصلاح
الجروح دى غير الانتظار .. ومنعرفش الانتظار دة هيداوى جروحنا ازاى !!؟ ..
يمكن عشان فى انتظارنا الزمن ينسى ... لكن فى جروح كائنات حية جوانا
بتتنفس معنا هوانا وبتعيش معنا يومنا ومش بتموت ابدا بالوقت .. طب يمكن
عشان فى انتظارنا هنقابل الحل ؟! .. طب لو الحل مش موجود فى طريق الانتظار
يبقى كدة هنعيش مستسلمين للوجع ؟!!
لكن اوقات احنا بيبقى عندنا الحل السحري فى تخطى الجروح اللى من النوع دة فى
" بدايات السنة "

اد اية احنا بنحتاج لبدايات .. بدايات تخرجنا من عمتنا .. من جروحنا ..
ساعات البدايات بتبقى هروب والهروب دة بيبقى مريح .. جايز راحته للحظات
.. لساعات .. لايام .. لكن اوقات بيبقى مستمر بشكل اطول .. مستمر
بشكل يخلينا فرحانين بهرونا .. مرتاحين للبداية .. لكن هل بنبقى مصدقين ...
!!؟

وانا بحتفل زى كل اللي احتفلوا ببداية سنة جديدة .. لاحظت حاجة فيا خصوصا مع شوية غلطات لسه بعملها قصاد ضعفاتي الشخصية وجروحي اللي لسه مش اقدر اتغلب عليها بالانتظار .. انا زى كل الناس اللي عاوزه تصدق البداية .. اللي عاوزه تشوف الهروب مريح .. اللي عاوزه تمسك عصا سحرية اسمها " راس السنة " وتخطب بيها على كوم الوجع والمشاكل اللي فيها ببساطة تحتفى .. نوع من السحر اللي جانب مننا كواقعيين مش قابل انه يصدقه لكن جانب اكبر جوانا محتاجه .. محتاجه جدا حتى لو وهم انه يعيشه .. بس هل انا هبقى من اصحاب الحظ السعيد اللي يفضل معاهم الهروب مريح لفترات طويلة ..؟؟ ... السؤال اجابته صعبة لاننا عارفين الاجابة كويس

الفيس بوك وسيلة لانك تراقب المشاعر والاحاسيس والاراء بخصوص السنة الجديدة ... نسبة كبيرة بتحتفل بالسنة الجديدة عشان تهرب من صفحاتها القديمة .. عشان تهرب من جروحها العميقة .. ناس بتحتفل بالسنة الجديدة عشان تنسى الماضى وتبدأ تلاحظ ان فى حياة لسه قدامها ليه منجربش اننا نعيش بقى ونقفل صفحات من حياتنا متنا فيها اكر ما عيشنا .. دة تفكير الكثير مننا اللي عانى ومر بظروف صعبة خلال السنة او السنين اللي فاتت من عمره .. انا حاسس ان فى ناس بقت زى الارواح التايهة فى سراديب وبتدور على طاقة نور عشان تعيش .. ودة واقعى وسليم لو كانت طاقة النور طاقة حقيقية مش سراب ولانها ارواح تايهة وطايشة فى اغلب الوقت بتبقى الطاقة دى سراب للاسف ... انا حاسس ان فى ناس من كتر السواد اللي شافته صدقت انه مبقاش فى جواها قلب اخضر قابل انه يتروى من جديد بالاحلام فى الحياة .. وبمجرد ما تقرب

بداية سنة جديدة تتحول الارواح التايهة لارواح مهللة واصحاب السواد الاعظم يرتدوا ملابس الفرحة ... لكن يا ترى بعد خمس او ست شهور من السنة الجديدة
هيحصل اية؟؟

ناس كثير بتتطلب من السنة الجديدة انها تبقى احلى .. الظروف في الدنيا تبقى
مثالية ويتوقعوا من أنفسهم ومن غيرهم المثالية وكأن اللجنة قررت تبقى متواجدة
على كوكب الارض .. اعتبرنا ان الرقم لما يزيد في عمر السنين ان الفرحة جwana
تلقاها هتزيد والضحكة هتتطلع بجد والدمعة هتختفى نهائيا ولون الدنيا بقى اللون
الابيض وهنعيش كلنا سعداء في عالم قوس قزح المثالي .. بدأنا نصدق ان البدايات
في حياتنا بتصنعها الارقام وان البدايات في حياتنا مش بايدينا اننا نوجدها
لازم نفهم ان الحاجة المؤكدة في حياتنا اننا هنغلط .. اننا هنرتكب اخطاء ... اننا
هنجرح حد ... اننا هنتجرح .. لكن القدرة في اننا " نستفيد " .. " نتعلم " ..
نصلح " .. " نقوى " هو دة اللى بيصنع الفارق ..
لازم نفهم ان كل يوم في حياتنا هو بداية واننا لو عدينا باصعب يوم في عمرنا
اليوم دة مهما زاد في قسوته هيفضل مدته اربعة وعشرين ساعة .. واحنا عندنا
القوة اننا نتجاوزه ..

الحقيقة جwana اننا خايفين من النهايات لبعض مشاعرنا لاننا اتعلقنا بيها جدا ودة
ساعات ييمنعنا من البداية .. الحقيقة جwana اننا مش مستوعبين القدرة على اننا
نبدأ من جديد واننا نقدر نشيل كل الرواسب اللى بتطاردنا في حياتنا مهما كان
الماضى لاننا بس خايفين او جنبنا ..

انا معنديش مشكلة انك تشوف السنة الجديدة امل وبداية .. لكن عندي مشكلة
انك تشوفها بطريقة وهمية كأنها الحل والانتقاذ الوحيد .. انك تشوف الرقم اللي
يزيد هو اللي يغيرك ويصنعك انسان جديد .. انا عندي مشكلة لو مش فاهم
ان اللي بيخلي السنة الجديدة جديدة ومختلفة وممكن تبقى احسن هو " انتا " ..
ان اللي يصنع الفرق ما بين السنة اللي فاتت من عمرك والسنة الجديدة في
حياتك هو " انتا " .. انتا لو مش مصدق دة اوعذك ان السنة الجديدة هي السنة
القديمة وهتفضل مسجون في سجن الوهم .. فارجوك شوف في نفسك الفرصة
واقبل في نفسك التغير واصنع لنفسك الفارق متستناش شوية ارقام تصنع حياتك

حروف اللغة العربية زى صوابع البيانو مجرد محتاجة لعازف ماهر عشان يخرج منها
اروع الكلمات .. الشعر وسيلة عزف فريدة لاجراي اجهل السيمفونيات الموسيقية
من الروح والقلب .. عشان كدة كان رهاني دائما على الشعر في توصيل الموسيقى
الى جوايا ... الشعر حالة من العشق مع ٢٨ ست ممشوقين القوام ومخلوقين من
الذهب الصافي النقي بدون شوائب وهن تحت امرك وهن تحت طوعك اذا تمكنت
في العشق الصحيح لهن هتقدر تبقى اعظم مايسترو في العالم
منكرش ان دائما كتابة الشعر بالنسبة ليا تحدى وبحب امارس التحدى والمغامرة في
كل حاجة في حياتي .. ولان الكتاب نفسه في حد ذاته مغامرة وتجربة حابب اني
اخوضها .. مقدرش اخوض التجربة من غير ما اكتب عن جزء بحبه فيا جدا وهو
كتابة الشعر .. لكن عشان مخرجش من اطار الكتاب هقدم فكرة في شعر جايز
تعجبك وجايز متعجبكش وجايز تحس بالموسيقى اللي فيها وجايز ترفضها .. في
جميع الاحوال زى ما قولت مقدرش اخوض التجربة من غير ما امارس مصايي ..

رسموا للحياة أبواب	حكموا علينا منها نفوت
وانا بالعكس بقلبي	عايش حر مليش حدود
رسمي للحياة افراح	أرض وسا وورود
وما فيش قصادي بيان	ولا عايش بحكم شروط
في ناس ساكتة من الوجع	وفي ناس وجعها سكوت
وفي ناس كاتمة الفرح	وفرحها قاتله الخوف
وانا عكسهم مرتاح	عندي الكتاب مفتوح
اتوجع اقول الاله	واطلع حزني بكل هدوء

وارقص فى وقت الفرح و غنايا بعلو الصوت
حقيقتى مش بالكيف ولا فيها خداع ولا زيف
ولا فيها صاحب ملك والثانى ساكن ضيف
انا البطل والكاتب والسيناريو ماشى صامد
بعدى مطب مطب وطريقى هيفضل سالك
الليل عندى اصله نهار هرب فى لحظة
لانه جبان بس حتى لو كان هرب محزوم
الشمس فى قلبى قوية تقدر فى ليلى تفوت
منا قلبى عايش حر عايش ملوش بيان
فاية يمنع شعاع الشمس من انه يخلق فى قلبى نهار
افهم يا ليل حقيقتى انا قلبى بالالوان

نهاية مفتوحة

قلبي وعقلي وروحي كانوا بلاد مقهورة ... محنة من عتمة الايام .. والعتمة كانت
ماتت اقوى من الاحلام .. طردت الحياة من بلادى وسانتهم اوطان مهجورة ..
بدون انسان .. لان كان مات فيا الانسان ...
عني مر زمانى القليل على الارض قابلت وحوش واساطير الجروح اللي تعلم في
القلب ... كان الوجع صديق مخلص مش قادر يتخلي عني للحظة ... حتى لما
احاول افرح كان بيمنعني وكأن الفرح فساد .. كان الامل محذور وكان كل
المفروض مقبول في عالمي ... كان نفسي جدا احط تتر للنهاية في فيلم حياتي
لكن المنتج اشترطت نهاية الفيلم القدريه والا البطل بعد النهاية يروح للحجيم ...
ويكفيني حجيم واحد امر بيه... وبالتالي كنت مضطر اكمل قصتي بدون اى رغبة
في الاستمرار ... اصعب احساس انك تعيش ميت
كنت زى الصلصال وتشكل بكل صور الوجع .. كنت في حفلة مليانة دوشة
ومليانة وشوش لكن انا كنت مسجون في زاوية منسية من الحفلة وببكي ..
ساعات ببكي بدون سبب معين ... لان الاسباب كانت كتير ومن الصعب
تحديد سبب الدمعة اللي بتجرى على حدودي في اللحظة .. حاولت كتير اطلب
مساعدة و اصلى ... الحلول المعتادة اللي لازم تبقى مليانة ايمان عشان احاول
اعيش ... لكن ايمانى من الواضح انه كان ضعيف ومن الواضح اني صوته كمان
كان ضعيف لان محدش سمعني ...

حاولت كثير اقوم بس كان السقوط هو النهاية الدائمة لكل محاولة .. لكن
مبطلتش محاولة .. حاولت بكل قوتي الباقية انى اعى الغيوم السودا اللى ملت
حياتى .. بدات اتنفس بسيط لكن لسه ... لسه محتاج للمسة دفا واوكسجين
امل اكثر .. لسه مكنتش قادر اعيش
لحد ما قابلتك ..

لقيت فيكى الحياة ... ضحكك كانت اقوى من كوم الوجد اللى فى ... كنت
اول مرة اصادف قلب بيضحك زى قلبك ... كانت اول مرة يزونى حد فى حلم
وينقذنى حتى قبل ما اعرفك ... ساعتها حسيتك استجابة الصلاة ... ساعتها
حسيتك علامة من العلامات اللى بترسلها السما كنجدة لحياتى وحسيت
فيكى ايد المساعدة اللى ياما طلبتها ... مسكت فيكى وفى ضحكك ...
وزرعت بذور الامل فى ارضك ... وارضك كانت خصبة كفاية انها تثمر بورد
خلصنى من كل الهموم ... وكأن الحياة بتوفى ديونها اللى عليها ليا بيكى .. كل
شئ بدأ بيكى يرجع ... وكل شئ بدأ بيكى يضحك

صدفة جازى او احتياج لامل هو اللى خلاق اشوفك خلاص من عتمة الايام ..
كنتى فرصة لانى اعى بيوتى المهجورة باصحابها الاصليين ... شعوب من العشاق
للالمل والتفاؤل والضحكة ... شعوب زرعت الاشعار والورد على ابواب القلب
والعقل والروح ... حولت وطنى لسما زرقا وسحاب بيضحك وهوا منعش ييجرى
فى كل خلية فىا يعلن الانتصار على الفساد ... يعلن عودة الحياة للانسان اللى
فىا ...

الغريب ان كل دة حصل بدون ما تقصدى ... كأنتك جنية او ساحرة ... كأن
بجرد القرب منك ملجأ و هروب من كل الجروح ... كأن كلماتك وكأن
ضحكاتك قرار بطرد كل الافكار اللى تمنع التمتع بالحياة ... رجعت اعيش ..
خلقت انسان جديد منى قادر يضحك من قلبه .. حسيت بقوتى وبعضلات
احلامى القادرة على هزيمة اى يأس ... كأن فى مغناطيس يجذبني لعالم تانى من
الالوان ... عالم تانى من الارواح المبهجة .. عالم تانى من الضحك اللى ما
يخلصش .. حياتى بقت ممتعة ..
لكن ادمتلك ...

كان فى نقطة ضعف واحدة فى السيناريو الجديد هى " ادمانك " .. مكنتش
حاسب احساس طرفى المعادلة ... انا بقيت فى وسط حالة جميلة ... بقيت اقرب
من اى وقت قبل كدة للسعادة الدائمة الحقيقية .. رجع لقلبي نسبة كبيرة من
الايمان اللى ينقل جبال ... بس التحميل مكنتش خلص للآخر .. الاحلام لسه
لمستش كلها ارض الواقع ... والمشكلة الاكبر كانت فى ان اهم احلامى " انتى
" كان من الفئة دى

انتى غيرتى حياتى لكن انا مقدمتش لحياتك اى شئ ... بدأت احاول بعد رجوع
قوتى انى اقدم ليكى كل شئ ... بس اقدم اية وانتى مش محتاجة !!؟ .. كانت
هنا المعضنة لانك فى السيناريو كنتى الطرف الاقوى وكنتى الطرف اللى ساهم فى
عودة الحياة ليا لكن بدون ما تقصدى .. وكنتى الطرف اللى مش محتاج اما انا
اللى كنت محتاجلك .. حياتك مليانة بكل حاجة بتحبها .. شبعانة من الدنيا

ومن الاله حجاب ومن الابتسامات ومن الاحلام .. اية المختلف اللي اقدر اضيفه
ليكي ١١٩ .. خيرة كوم الوجع ولا جمال الانسان الجديد اللي ساهمتي فيه ١١٩! ...
من الطبيعي ان وجودي في حياتك يبقى زى عدمه .. حتى لو كنت بقيت اروع
الاشخاص في نظر جميع من في الحفلة لكن انتي مبسوطة في الحفلة اية الحاجة اللي
هتدفعك لانك ترقصى الرقصة الحميمة معايا ١١٩! ..

كان لازم اخاطر بانى اخترق العالم الخاص بيكي عشان اكون شريك في فيلمك
المبهج لكن .. اسوارك كانت عالية وحدودك كانت صلبة ... كلسات جوايا
كانت بتخرج في حالة تحفز بانى مش ضعيف زى زمان حتى لو تنسأ اسوارك
وحودك انتي .. كنت مصدق قدرتي .. كنت مؤمن بالحالة اللي وصلت ليها
... الناس كلها بتشوفني رائع ومختلف ..
لكن رفضتي ...

صدر اعلان منك بانى لازم اكمل بدون ما تكوني في دنيتي ... حكمتي بانك
مش محتاجني وانى مش فارق ... كانت اول هزيمة ليا من زمان اوى ... كانت
اول دمة ليا من زمان اوى ... كان اول جرح يعلم تاني في القلب من زمان اوى
اشباح العتمة في كل ركن في اوضتي ... خيول الماضى سامع حركتها وسباقها في
كل مساحة من افكارى ... نبضات كوم الوجع حاسس خطاويها في كل حنة في
قلبي .. قلمي حتى بيرتعش وكل خلية فيا خايقة ... خايقة من انى ارجع تاني
انكسر ..

نهاية مفتوحة

المحتويات

أنا	٥
عصفور بلكونتي	١١
وصرخ الحمار "يا بني آدم"	١٧
عبادة الأصنام	٢١
جواب لحبيبي اللي لسة ماحبتهاش	٢٥
إحلم صح	٣١
حياتنا ألوان	٣٥
الفراشات	٤١
البحر	٤٥
كن مجنوناً ترى الوجود مجنوناً	٤٧
النسخ القديمة	٥١
قطر الحب	٥٥
في الحب لا تصمد	٥٩
المسؤولية	٦٥
العملة النادرة	٦٩

٧٣.....	ولاد أختي
٧٧.....	نازعة الصبار
٨١.....	المنقوشون على القلب
٨٧.....	الآن
٩١.....	الفراق
٩٥.....	القلوب الدافية
٩٩.....	عائشة ميتة
١٠٣.....	ولاد الشوارع
١٠٧.....	زغزغة الروح
١١٣.....	المثالية
١١٧.....	أسرتي
١٢١.....	رأس السنة انت الفارق
١٢٥.....	الشعر
١٢٧.....	نهاية مفتوحة
١٣٢.....	المحتويات

